

ФОФУРЖОН СОТИМОВ

# БОБУРИЙЗОДАЛАР

ТОШКЕНТ «МАЊНАВИЯТ» 2003

Ушбу рисолада хорижда яратилган тарихий манбаларга таянилган ҳолда Ҳиндистонда Заҳириддин Муҳаммад Бобур томонидан асос солинган бобурийлар салтанати ҳақида, бу салтанатни мустаҳкамлаш ва кудратини янада оширишга ҳисса кўшган бобурий шаҳзода ва маликаларнинг шахсияти, инсоний қиёфаси ҳақида қимматли маълумотлар берилган.

**Масъул муҳаррир — X. Султонов**

**Тақризчи — Р. Фармонов, тарих фанлари доктори, профессор**

Раҳматли онам Саломхон аянинг пок руҳларига бағишилайман.

*Муаллиф*

## МУҚАДДИМА

Мовароуннаҳр тарихида ўчмас из қолдирган, Афғонистон ва Ҳиндистон тарихида эса бир неча асрга татигулик бурилиш ясаган, бу мамлакатлар халқларининг маданий, ижтимоий ва иқтисодий ҳаётида сезиларли ўзгаришларни амалга оширган буюк давлат арбоби, моҳир саркарда, улкан шоир, аллома ва меъмор, хуллас, баркамол инсон — темурий шаҳзода Заҳириддин Муҳаммад Бобур подшоҳи фозий Ҳиндистонда бобурийлар салтанатига асос солди, бу салтанат тарқоқ мамлакатнинг сиёсий бирлигини таъминлади ва унинг гуллаб-яшнаши учун асрлар оша ижобий таъсир кўрсатди.

Бобуршоҳ ва бобурий шаҳзодаларнинг ҳаёт йўли, уларнинг бекиёс бунёдкорлик ишлари, давлатни бошқаришдаги ислоҳотлар, қоловерса, инсон сифатидаги қиёфаси унинг ватандошлари қалбida, албатта, катта қизиқиш уйғотади.


Ҳиндистондек буюк мамлакат тарихида Бобуршоҳ ва унинг авлодлари фаолияти салмоқли ўрин эгаллайди. Бу мамлакатда бобурийлар салтанати ўрнатилгандан бўён 480 йилга яқин вақт ўтган бўлса ҳам, тарихчилар ва маҳаллий халқ уларнинг номларини алоҳида эҳтиром билан тилга олади.


Бобурийлар сулоласи вакиллари ҳақида нафақат шарқ, балки гарб мамлакатларида, шу жумладан Буюк Британияда ўнлаб илмий-тарихий асарлар яратилган. Бу асарларнинг кўплари бобурий шаҳзодаларнинг замондошлари томонидан яратилган бўлиб, асар муаллифларининг аксарияти ўша даврда бўлиб ўтган воқеаларда ўзлари иштирок этганлар. Бу асарлар Ҳиндистонда уч ярим асрга яқин муддат давомида ҳукмронлик қилган бобурийлар сулоласи ҳақида қимматли маълумотлар беради.

Биз ушбу рисолада хорижда яратилган тарихий манбаларга таяниб, Ҳиндистонда Бобуршоҳ томонидан асос солинган бобурийлар салтанатини сақлаб қолган, унинг пой-деворини мустаҳкамлаш ва қудратини янада оширишга муносиб ҳисса қўшган бобурий шаҳзодалар ва маликалар-

нинг шахсияти ва инсоний қиёфаси ҳақида айрим мулоҳазаларни хурматли китобхонларимиз эътиборига ҳавола қилмоқчимиз. Бу давр бобурийлар давлати ўрнатилган кундан бошлаб то Аврангзеб ҳукмронлигига қадар катта бир даврни қамраб олган бўлиб, 180 йиллик тарихни ўз ичига олади ва бобурийлар салтанатининг энг гуллаб-яшнаган ва тараққиёт чўққисига чиқсан даври ҳисобланади. Аврангзеб ҳукмронлигидан кейинги давр эса бобурийлар салтанати тарихида сўниш палласи бошланишидан далолат беради ва бу соҳа алоҳида тадқиқотлар ўтказишни тақозо этади.

### Бобурий шаҳзодалар шажараси





## ЗАҲИРИДДИН МУҲАММАД БОБУР

### Заҳириддин Муҳаммад Бобуршоҳ ҳаётидаги муҳим саналар

- 1504 й. — Бобур Мирзо Кобул тахтини қўлга киритди.
- 1505 й. — Бобур Мирзонинг онаси Кутлуғ Нигор хоним вафот этди.  
Бобуршоҳнинг Ҳиндистон сари дастлабки юришлари бошланди.
- 1507 й. — Шайбонийхон Хурсонни босиб олди.
- 1508 й. — Муҳаммад Ҳумоюн таваллуд топди. Бобур Мирзо ўзини «шоҳ» деб эълон қилди.
- 1510 й. —  
декабр — Хонзода Бегимнинг Шайбонийдан бўлган ўғли Шаҳзода Ҳуррам туғилди. Шайбоний қўшинлари Исмоилшоҳ лашкари томонидан тор-мор этилди. Шайбоний ўлдирилди.
- 1511 й. —  
октябр — Бобуршоҳ Самарқандга ғолибона юриш қилди.
- 1512 й. — Бобуршоҳ Самарқандни тарқ этишга мажбур бўлди.
- 1516 й. — Шаҳзода Аскарий Мирзо туғилди.
- 1519 й. — Ҳиндистонга иккинчи ва учинчи бор юриш қилинди. Шаҳзода Ҳиндол Мирзо туғилди.
- 1520 й. — Ҳиндистонга тўртинчи бор юриш қилинди.
- 1521 й. — Ҳумоюн Мирзо Бадаҳшон ҳокими этиб тайинланди.
- 1522 й. — Бобуршоҳ Кандаҳорни қўлга киритди.
- 1524 й. — Шоҳ Исмоил вафот этиб, ўғли Шоҳ Тахмасп Эрон тахтини эгаллади.
- 1525 й. — Бобуршоҳ Ҳиндистоннинг Панжоб вилоятини эгаллади.
- 1526 й. — Понипат қишлоғи яқинидаги биринчи жангда Бобуршоҳ қўшини Деҳли султони Иброҳим Лўдийнинг кўп сонли қўшини устидан ғалаба қозонди.
- 1527 й. — Қанва яқинидаги жангда ражпутлар сардори Рона Сангра қўшини тор-мор этилди.
- 1528 й. — Чандирийдаги жангларда Бобуршоҳ яна ғолиб келди.
- 1529 й. — Гагра ёнидаги жангда Иброҳим Лўдийнинг укаси Маҳмуд Лўдий қўшини устидан Бобуршоҳ аскарлари ғалаба қозониб, Бенгал шоҳи Нусратшоҳ билан дўстона алоқалар ўрнатилди.
- 1530 й. — Бобуршоҳ ёруғ оламдан кўз юмди. Деҳли тахтининг тожи ворис Ҳумоюн Мирзога кийдирилди.

Заҳириддин Муҳаммад Бобур 1483 йилнинг 14 февралида Андижонда, соҳибқирон Амир Темур ҳазратларининг бешинчи авлоди бўлмиш Фарғона мулкининг ҳукмдори Султон Умаршайх Мирзо оиласида дунёга келди. Бобур Мирзонинг онаси Кутлуғ Нигор Хоним Тошкент хони Юнусхон-

нинг қизи бўлиб, у Чингизхоннинг 15-авлоди ҳисобланарди.

Умаршайх Мирзонинг бешта хотинидан уч ўғил ва беш қиз туфилган эди. Қутлуг Нигор Хонимдан Хонзода Бегим (1478 й.) ва Заҳириддин Муҳаммад Бобур Мирзо туфилгандар. Мўғул хотини Фотима Султон Бегимдан Жаҳонгир Мирзо (1485 й.) исмли ўғил, андижонлик хотини Умид Оғачадан Меҳрибону Бегим (1478 й.) исмли қиз, Носир Мирзо (1487 й.) исмли ўғил ва Шаҳрибону бегим (1491 й.) исмли қиз туфилган. Оға Султон Бегим исмли хотинидан Ёдгор Султон Бегим (1494 й.) исмли қиз туфилган ва Султон Маҳдум исмли канизагидан Руқия Султон Бегим (1494 й.) исмли қиз туфилган эди.

Маълумки, Марказий Осиё ва Ҳиндистонда ҳукмронлик қилган соҳибқирон Амир Темур ва унинг авлодлари, хусусан, Заҳириддин Муҳаммад Бобур ўзларини Чигатой турклар авлодидан деб ҳисоблайдилар. Ўрни келганда, даштий мўғулларга нисбатан беписандлик билан қараганлари ҳолда, ушбу ўлкалар тарихида, уларнинг сиёсий ва маданий, маиший ҳамда иқтисодий ҳаётида чуқур из қолдирган буюк аждодлари ҳақида чуқур хурмат ва фурур билан сўз юритадилар.

## БОБУРШОҲ ОИЛАСИ

Тарихий манбаларнинг гувоҳлик беришича, Бобуршоҳдан тўртта ўғил қолган: Муҳаммад Ҳумоюн Мирзо, Комрон Мирзо, Ҳиндол Мирзо ва Аскарий Мирзо. Кичик ўғиллари Олур (Алвор) Мирзо, Анвар Мирзо, Борбўл Мирзо ва Фарруҳ Мирзолар ёш болалигидаёқ отасидан аввал вафот этганлар.

Бобуршоҳнинг бир неча қизлари бўлиб, уларнинг баъзилари сарой амалдорларига турмушга узатилган. Улар қуйидагилар:

1. Маъсума Султон Бегим. Унинг онасининг исми ҳам Маъсума Султон Бегим бўлиб, чақалоқлигидаёқ онаси оламдан ўтган ва чақалоқни онасининг исми билан атаганлар. Бу қиз Ҳирот шоҳи Мирзо Ҳусайн Бойқаронинг невараси, Мирзо Бадиuzzамоннинг ўғли Муҳаммад Замон Мирзога турмушга чиқкан.

2. Гулбадан Бегим. 1522 йилда Кобул яқинида туфилган. 1539 йилда Гулбадан Бегимни Ҳумоюншоҳ саройидаги амалдорлардан бўлган Ҳўжа Хизирхонга турмушга узатил-

ган ва ундан бир ўғил фарзанд кўриб, унга Саодатёр деб исм қўйилган.

3. Гулранг Бегим. Бобуршоҳнинг Дилдор оғача Бегим билан бўлган никоҳидан 1511—1515 йиллар ўртасида Кобулда дунёга келган биринчи қизи. Ҳумоюншоҳ саройидаги амалдорлардан бўлмиш Нуриддин Муҳаммад Мирзога турмушга чиққан. Уларнинг қизи Салима Султон Бегим бўлиб, дастлаб Ҳумоюншоҳнинг яқин кишиси бўлмиш Байрамхонга, унинг ўлимидан сўнг Ҳумоюннинг ўғли ва тахт вориси Акбаршоҳга турмушга чиққан.

4. Гулчехра Бегим. Бобуршоҳ ва малика Дилдор оғача Бегимнинг иккинчи фарзанди. 1515—1517 йиллар орасида дунёга келган. Гулранг Бегим, Ҳиндол Мирзо ва Гулбадан Бегим билан бир онадан туғилган. Бобуршоҳнинг тоғаси Аҳмад Мирзонинг ўғли бўлмиш Султон Тўхта Бўғаҳонга 1530 йилнинг иккинчи ярмида 14 ёшида отаси томонидан куёвга узатилган. 1533 йилда бева қолгач, Ҳумоюншоҳ Балхга юриши олдидан ўзбеклар султони Аббос Султонга узатилган.

5. Гулзор Бегим. (Баъзи манбаларда Шаҳрибону Бегим.) Бобуршоҳнинг малика Гулруҳ Бегим билан бўлган никоҳидан дунёга келган. Шаҳзодалар Комрон Мирзо ва Аскарий Мирзолар билан бир онадан туғилган. Бобуршоҳнинг энг кичик укаси Носир Мирzonинг ўғли Ёдгор Мирзога турмушга чиққан.

6. Фахруннисо. Бобур Мирzonинг биринчи хотини Ойша Султон Бегимдан туғилган ва бир ой ўтмай вафот этган.

Бобуршоҳнинг хотинлари ёки ҳарамидаги канизаклари ҳақида қуйидаги маълумотга эгамиз. Бизга маълумлари қуйидагилар:

1. Ойша Султон Бегим. Бобурнинг тоғаси, Самарқанд султони Султон Аҳмад Мирzonинг қизи. У беш ёшлигидаёқ Бобур Мирзога унаштириб қўйилган эди. Ундан Фахруннисо исмли бир қиз туғилиб, бир ойдан сўнг вафот этган. Бобур Мирзо Тошкентдан чиқиб кетиши пайтида опаси Солиҳа Бегимнинг ташвиқоти билан омадсиз эрдан юз ўтирган.

2. Зайнаб Султон Бегим. Бобур Мирzonинг иккинчи тоғаси, Ҳисор ҳокими Султон Маҳмуд Мирzonинг бешинчи қизи. Унга Бобуршоҳ Кобул тахтини эгаллагандан кейин онаси Қутлуғ Нигор хонимнинг тавсияси билан унга уйланган. Бироқ турмуши яхши бўлмади. Икки-уч йилдан кейин у чечак касалидан вафот этган.

3. Мაъсума Султон Бегим. Бобурнинг биринчи хотини Ойша Султон Бегим вафотидан сўнг, Бобуршоҳ уни Хурсонда учратиб қолиб, ўзига турмушга чиқишини сўраган ва Кобулга олиб келиб унга уйланган. Ундан бир қиз туғилиб, у чақалоқлигидаёқ онаси вафот этган ва унга онасининг исмини қўйишган.

4. Моҳим Бегим. Ҳирот шоҳи Ҳусайн Мирзо (Бойқаро)-нинг қариндошларидан бўлиб, ўз даврининг етук олималаридан бўлган. Кенг билими, ақл-заковати ва донолиги туфайли сарой аъёнлари орасида катта обрў ва иззат-икромга сазовор бўлган. Бобур Мирзо унга 1506 йилда Ҳирот зиёрати пайтида уйланган. 1508 йилда Носириддин Муҳаммад Ҳумоюн Мирзо шу маликадан туғилган. Ундан кейин Борбўл Мирзо, Мехр Жаҳон Бегим, Эсон Давлат Бегим ва Фарруҳ Мирзо исмли фарзандлар дунёга келган. Бироқ улар гўдаклигидаёқ дунёдан кўз юмғанлар. Шундан кейин Гулбадан Бегим ва Ҳиндол Мирзолар шоҳ Бобурнинг фармонига биноан 1525 йилда унинг тарбиясига берилганлар.

5. Солиҳа Султон Бегим. Бу малика Дилдор Оғача номи билан танилган бўлиб, шаҳзодалар Абу Носир Муҳаммад (Ҳиндол) Мирзо, Олур (Алвор) Мирзо ҳамда маликалар Гулранг Бегим, Гулчехра Бегим ва Гулбадан Бегимлар ҳам ана шу маликадан туғилганлар. А. Бейвериж хонимнинг тахминича, Бобуршоҳнинг ушбу маликага уйланиши «Бобурнома»нинг узилиб қолган даври, яъни 1511—1519 йилларга тўғри келади.

6. Гулруҳ Бегим. Комрон Мирзо, Аскарий Мирзо, Шоҳруҳ Мирзо, Аҳмад Мирзо ва Гулзор Бегимлар шу маликадан туғилган.

7. Биби Муборика Бегим. Бобуршоҳ вафотидан сўнг бева қолган, айрим манбаларда Бека Бегим номи билан ҳам юритилади.

«Ҳумоюннома»да Бобуршоҳнинг Ҳиндистонга юриши олдидан (яъни, 1519 йиллар атрофида) Юсуф — зай деб аталган аффон уруғи сардори Маликшоҳ Мансурнинг қизи бўлган Аффон оғачани ўз никоҳига олгани ҳақида сўз юритилади. Ушбу малика ана шу Бека Бегим, яъни Биби Муборика эди. Тарихнавис Ҳофиз Муҳаммаднинг гувоҳлик беришича, Биби Муборика Бобуршоҳнинг энг кенжа ва энг севимли маликаси бўлган ва Ҳиндистон сари қилинган юришларида доим ҳамроҳлик ва ҳамдардлик қилган садоқатли малика мана шу Биби Муборика эди. Ҳиндис-

тонга 1529 йилда малика Моҳим Бегим ва Гулбадан Бегимлар билан бирга кўчиб келган эди. Бироқ тақдир унга фарзанд ато қилмади. Бу ҳол, муаллифнинг фикрича, ҳасадгўй кундошларнинг турли дорилар билан унинг пуштини пинхона қуритиш ва подшоҳ эрининг мижозини сусайтиришга уринишлари натижасидир.

Бироқ малика Биби Муборика Бегим Бобуршоҳдан фарзанд кўрмаган бўлса ҳам, эрига бўлган садоқати ва вафодорлиги туфайли Шершоҳ Сур тазиёки остида саройдагилар Агра ва Дехлинин ташлаб чиқиб кетаётган аянчли бир пайтда мархум эрининг васиятини амалга ошириш мақсадида Шершоҳнинг рухсати билан Бобурнинг қабрини Кобулга кўчириб олиб келиб дафн этган. У Акбаршоҳ давригача яшаб иззат-икромда умргузаронлик қилган. Унинг акаси бўлмиш Мир Жалолхон Бобуршоҳнинг Ҳиндистон сари юришларидан бирга бўлиб, унга садоқат билан хизмат қилган.

Ҳиндистон тарихида Бобуршоҳ энг диққатга сазовор бўлган шахслардан бири бўлса, Осиё тарихида ўтган ҳукмдорлар орасида энг юқори мавқеда турадиган ҳукмдорларданdir. Ҳиндистонда узоқ муддат яшаб, у ерда Англия қиrolичаси Викториянинг сиёsatини рўёбга чиқаришда катта хизмат кўрсатган полковник Ж. Б. Маллесон ўзининг 1894 йилда Оксфордда нашр этилган «Ҳиндистон ҳукмдорлари. Акбар ва Мўғуллар Империясининг юксалиши» деб номланган асарида Заҳириддин Муҳаммад Бобур Подшоҳи Фозий шахсиёти ҳақида мулоҳаза юритаркан, унинг Ҳиндистон тарихидан ўрин олган хизматларини қадрлаб, юқорида номи зикр этилган асарини ёзиш арафасидаги ўз кечинмаларини шундай изоҳлади: «Бобур ўз ёшига нисбатан анчагина бой ҳаёт тажрибасига эга, табиатан саховатли, қўл остидагиларга фамхўр, оила аъзоларига меҳрибон, дунёқарашиб улуғвор инсон бўлиб, унинг Ҳиндистонга нисбатан олиб борган сиёsatини «фотиҳ саркарда» иборасидан кўра кенгроқ мазмундаги тавсиф» билан шарҳлаш лозим бўлади». У фикрида давом этиб шундай дейди: «Мен уни қудратли ҳукмдор, моҳир саркор (ташкилотчи) сифатида, шунингдек, биз инглизлар кўп жиҳатларини ўзлаштириб олганимиз — мукаммал давлат тизимиning асосчиси сифатида, Ҳиндистонда беш юз йилдан бўён давом этиб келаётган парокандалик ва бошбошдоқликка барҳам бериб, ўзаро фанимлик муносабатида бўлган қавмлар ва уларнинг хон ва сultonларининг бошини бир жойга қовуштириб муросага келтирган, улар-

нинг можароларини ҳал этишда холисона сиёсат юргизган одил ҳакам сифатида тасаввур қиласман. Мен уни ғамхўр оила бошлиғи сифатида, меҳрибон ота сифатида, раият орасига кутқу соладиган диний эътиқодлар зиддиятига қарамасдан ўз ақл-фаросати билан иш кўрадиган, ўз фикри ва қарашларида муқим турадиган тадбиркор инсон сифатида кўз олдимда гавдалантириш ниятида бўлдим»<sup>1</sup>.

Бобуршоҳ ҳақида хорижда яратилган кўплаб илмий-тарихий асарлар орасида Ҳиндистонда 20 йил яшаб, у ердаги мавжуд кўхна қўлёзмалар асосида Бобуршоҳ ва Ҳумоюншоҳ ҳаёти ва фаолиятини қадам-бақадам ўрганганд шотландиялик шарқшунос У. Эрскиннинг «Темурийлар авлодидан бўлмиши Бобур ва Ҳумоюн ҳукмронлиги давридаги Ҳиндистон тарихи»<sup>2</sup> асари ўзининг оригиналлиги билан алоҳида аҳамият касб этади.

Бу асарда Бобуршоҳнинг Мовароуннаҳрдан Ҳиндистонгача бўлган юришидаги кечинмалари батафсил ҳикоя қилинади. Айниқса, Бобуршоҳнинг оддий инсон ва шоҳ сифатидаги қиёфаси ҳафсала билан ёритиб берилади. Муаллиф шарқ тарихнавислари йўлидан боришга интилган, ўтмишда яратилган 200 дан ортиқ қўлёзмаларни мутолаа қилган, улардан кўчирмалар келтирган, тарихий манбаларга ҳалоллик ва холисона ёндашган, тарихий воқеалар, далиллар, хужжатлар ва ривоятларни чукур таҳлил қилиб умумлаштира олган беғараз тадқиқотчиидир. У Бобуршоҳ табиатидаги жанговарлик, саховатпешалик, камтарлик, одамийлиқ, зукколик, зийраклик, нозик дид, яхшиликни қадрлай билиш, тадбиркорлик, узоқни кўра билиш каби ижобий фазилатларни тўла ва муфассал ёрита билган. Инсон табиатидаги бу хислатларни муаллиф кўплаб мисоллар асосида моҳирлик билан ёритиб берган.

Бобур Мирзо ҳали болалигига ёқ, отасидан қолган мўъжазгина Фарғона вилоятини бошқаришни ўз зиммасига олган ва бобокалони Соҳибқирон Амир Темурдан қолган пойтахт Самарқанд таҳтини эгаллашни кўзлаган файратли ва шиҷоатли саркарда эди. У умр бўйи улуғворликка инти-

<sup>1</sup> Malleson G. B. *Rulers of India. Akbar and the Rise of the Mughal Empire.* 1894, Oxford. p. 6.

<sup>2</sup> Қаранг: У. Эрскин. Бобур Ҳиндистонда. Т., 1995, Чўлпон нашриёти. Инглизчадан F. Сотимов таржимаси. Асл нусхаси William Erskine. *History of India under Baber. Karachy,* 1974. Ушбу китоб 1854 йилда биринчи бор нашр этилган.

либ яшади ва бунга эришди ҳам. У тахтга чиққан пайтда атроф ўлкалар тахтида тажрибали, маккор султон ва беклар ўтирас эди. Уларнинг кўплари кўп ўтмай ўша даврга хос бўлган балога — сарой фитналарию фийбат ва иғволар қурбони бўлдилар. Шафқатсиз тақдир шамоллари Бобур Мирзони ҳам узоқ элларга элтиб ташлади. Лекин жисмидағи гайрат-шижоати ва мустаҳкам иродаси ва Яратганга бўлган садоқати туфайли у ҳаёт бўронларига бардош бериб, улардан устун келди ва ҳаётда ўз мавқенини сақлаб қолдигина эмас, балки отасидан мерос қолган мўъжазгина давлатдан бир неча бор катта ва салобатли улкан салтанат — Ҳиндистондаги буюк бобурийлар салтанатига асос солди.

Ҳали йигирма ёшга етмай туриб тақдирнинг барча иссиғу совуғини бошдан кечирди. У гоҳ уччалик назарга тушмайдиган шаҳзода қиёфасида, гоҳ улкан салтанат соҳиби бўлган буюк ва қудратли шоҳ сифатида, гоҳ мағлуб сарбоз сифатида, гоҳ ғолиб саркарда сифатида кўз олдимизда намоён бўлади. Лекин ҳар қандай шароитда ҳам ҳаётдан умидворлик, мустаҳкам ирова кучи, яратганга шукроалик туйғуси уни тарқ этмади.

Ота юртидан қувилиб, энг яқин ҳамроҳлари билан мусоғирликнинг энг оғир кунларини бошдан кечираётганда ҳам, унинг обрўси ва шуҳрати сўнмади ва минглаб кишиларни ўз ортидан эргаштира билди, уларни порлоқ кела-жакка ишонтира олди. Бошга тушган оғир кунларда кишиларни ишонтириш ва ўз ортидан эргаштира олиш учун жасур саркарда бўлиш лозимлигини у яхши англарди. Шу боис ҳаётининг дастлабки онлариданоқ суворийлик унинг асосий машғулотларидан бўлган эди.

Бироқ Бобурнинг жанговарликка бўлган иштиёқи уни тинчликни таъминлаш масъулиятидан узоқлаштиргмаган эди. Ҳарбий ҳаракатлардан тин олган пайтларни у ҳаётининг энг осуда кунлари деб ҳисоблар ва ором оларди. Бундай пайтларда, у одатига кўра, давлатни бошқариш ишини тақомиллаштириш билан машғул бўлар ва аркони давлатни мустаҳкамлаш ва раиятнинг турмуш шароитини яхшилаш чораларини изларди. Тарихнависларнинг таърифича, укалари ёхуд баразгўй бек ва амалдорлар унга қарши фитна ўюштириб исён кўттарганларида ҳам, агар улар айбини тан олиб авф сўрасалар, атрофдаги ҳукмдорлардан фарқли ўлароқ, уларни афв этибгина қолмай, ўртада гина ҳам сақламас эди.

Бобуршоҳ ўрта бўйдан юқорироқ, бақувват жуссали киши бўлиб, жисмоний ҳаракат талаб қиласидан машгулотларни яхши кўрарди. Машқлар натижасида у ўткир мерган ва монхир қиличбоз бўлиб етишган. Ўз ҳарбий ва жисмоний маҳоратини у кўпинча яккама-якка жангларда намойиш қилган ва ҳамиша голибликка эришган. Айтишларича, у шу дараҷада бақувват бўлганки, баъзан иккала қўлтиғига икки сарбозни қисиб олиб қалъа деворлари устидан юриб, тўсиқлардан бемалол ҳатлаб ўта олган. Эътиқодига кўра эса суннин мазҳабга мансуб бўлган тақводор ва художўй мусулмон бўлган бўлса-да, унинг табиатида диний фанатизм сезилмас эди. Эришган муваффакиятларини ҳам, омадсизликларини ҳам Яратганинг марҳаматидан деб билар ва бунга шукур келтирас эди.

Инсон сифатида у итоатгўй ўғил, садоқатли эр, ғамхўр ота ва самимий дўст эди. Атрофдагилар, хоҳ қариндошлари бўлсин, хоҳ ҳамроҳлари бўлсин, унга энг ишончли таянч деб қарар эдилар.

Гўзалликка интилиш ва уни қадрлаш Бобуршоҳнинг табиатига хос хислатлардан бўлиб, меъморий обидалар ва боғ-роғлар яратиш унинг севимли машгулотларидан бўлган. Дараҳтлар ва гулларнинг энг яхши намуналарини бошқа ўлкалардан олиб келиб боғлар яратар ва боғ сайридан ниҳоятда лаззатланар эди. У яратган обидаларнинг айримлари ҳали-ҳануз Ҳиндистонда қад кўтариб туради. Шоир сифатидаги унинг яратган ғазаллари ва «Бобурнома» деб атальмиш қомусий асари ўрта асрлар тарихини ўрганишда энг ноёб ва ҳаққоний манба сифатида ҳали-ҳануз қизиқиши билан ўқилади.

## ҲУМОЮНШОҲ

### Ҳумоюншоҳ ҳаётидаги муҳим саналар

- 1530 й.** — Бобуршоҳ вафот этди ва Ҳумоюн Мирзо Ҳиндистон таҳтини эгаллади.
- 1535 й.** — Ҳумоюншоҳ Баҳодиршоҳни енгиб Манду ва Чампанир қалъаларини забт этди.
- 1537 й.** — Ҳумоюн Чунор қалъасини забт этди.
- 1538 й.** — Ҳумоюн Бенгал вилоятини қўлга киритди.
- 1539 й.** — Кауза ёнидаги жангда Шершоҳ Сурнинг қўли баланд келиб, Ҳумоюн устидан ғалаба қозонди ва ўзини шоҳ деб эълон қилди.
- 1540 й.** — Қанауж ёнидаги жангда Ҳумоюн ютқизди ва Шершоҳ Дехли ва Аграпи эгаллади. Ҳумоюн қувғин қилинди.

- 1541 й.** — Август ойида Ҳумоюн Ҳамидабону Бегимга уйланди.
- 1542 й.** — Октябр ойида шаҳзода Ақбар дунёга келди. Ҳумоюн Эронга жўнаб кетди.
- 1543 й.** — Аскарий Мирзо гўдак Ақбарни ўзи билан бирга олиб қолди.
- 1545 й.** — Шершоҳ Сур вафот этди. Ҳумоюн Кобул ва Кандохорни забт этди. Ўғли Ақбарни ҳам ўз ҳузурига олди.
- 1546 й.** — Комрон Мирзо Кобулни эгаллаб олди. Ақбар ҳам унинг ихтиёрида қолди.
- 1547 й.** — Ҳумоюн яна Кобулни ва Ақбарни қайтариб олди.
- 1550 й.** — Комрон Мирзо яна Кобулни босиб олди, Ҳумоюн ниҳоят яна қайтадан Кобулни кўлга киритиб, Аскарий Мирзони ҳибсга олиб, сургун қилди.
- 1551 й.** — Ҳинддол Мирзо вафот этди.
- 1552 й.** — Ақбар Мирзо Фазнага ҳоким этиб тайинланди.
- 1553 й.** — Комрон Мирзо ҳибсга олиниб кўзига мил тортилди ва ҳаж сафарига жўнаб кетди.
- 1554 й.** — Ҳумоюннинг кичик ўғли Ҳоким Мирзо туғилди. Ҳумоюн Ҳиндистон сари юриш бошлади.
- 1555 й.** — Ҳиндистонда бобурийлар ҳокимияти қайта тикланди. Ақбар Мирзо Панжоб вилояти ҳокими этиб тайинланди. Унга Байрамхон оталиқ этиб тайинланди.
- 1556 й.** — Ҳумоюншоҳ вафот этди. Ақбар Мирзо Қалъаи Навда бобурийлар салтанати хукмдори деб эълон қилинди.

Муҳаммад Ҳумоюн (баҳтли, омадли) Мирзо Бобуршоҳнинг тўнғич ўғли бўлиб, «Ақбарнома»да айтилишича, у 1508 йилнинг 5 апрелида Кобулда туғилган. Унинг онаси Моҳим Бегим Ҳирот султони Ҳусайн Мирзо (Бойқаро)нинг қариндошлидан эди.

Ҳумоюн болалигиданоқ туркий, арабий ва форсий тилларни яхши ўрганган ва бу тилларда бемалол ёза олар эди, география, математика, фалсафа, астрономия ва астрология фанларини мукаммал билар ва ислом назариясига жуда қизиқар эди.

У жуда итоаткор ўғил бўлиб, отасининг ўгит ва насиҳатларига диққат билан қулоқ солар ва уларга садоқат билан итоат қиласар эди. Хотинлари, фарзандлари ва қариндошлирига чуқур самимият ва юмшоқ кўнгиллилик билан муомала қиласар эди.

Ёшлигиданоқ отаси Бобуршоҳ ёнида юриб унинг давлатни бошқариш услуби ва қўл остидаги амир ва бекларга, олиму уламоларга, оддий фуқарога ва, шунингдек, гуноҳкорларга қилган муомаласини яхши ўрганиб олгани учун отаси уни 20 ёшидаёқ Бадахшон хукмдори этиб тайинла-

ди. Хон сифатида ҳам у қўл остидаги амир ва бекларга нисбатан хушмуомалада бўлар, уларнинг барча қувонч ва ташвишларини биргаликда баҳам кўрар ва ўзига мурожаат қилган кишиларга самимият ва бефаразлик билан муомала қиласеди.

Диний эътиқодига қўра, у жуда тақводор мусулмон бўлса ҳам, эътиқодида диний фанатизм сезилмас эди, отаси сунний, онаси шия маҳзабига мансуб бўлгани учунми, диний мазҳабларга бефарқ қарап эди. Унинг хотини Ҳамидабону Бегим ҳам, ўзининг бош вазири Байрамхон ҳам шия мазҳабидаги кишилар эдилар.

Саройдаги олиму уламоларга диний эътиқоди ва ирқидан қатъи назар, катта ғамхўрлик билан қарап эди. Шунинг учун ҳам унинг ҳукмдорлиги даврида мамлакатда илм-фан ва маданият сезиларли даражада ривожланди. Пойтахтда «Дин — Паноҳ» деб аталган илм-фан марказининг курдирилиши бунинг ёрқин намунасиdir.

Ҳумоюн жисмонан қадди-қомати келишган, бақувват ва оғир меҳнатта чидамли йигит эди. Жасур ва қобилиятли жангчи бўлганидан жангдаги барча кутилмаган қийинчиликларга мардона бардош берар эди.

Понипат жангидан бир оз аввал отаси уни Ҳисор — Феруз вилояти хони Ҳамидхонни бўйсундириш учун юборган эди. У бу ишни муваффақият билан уддалаб қайтди, ўшанда Ҳисор — Феруз вилояти унга отаси Бобуршоҳ томонидан инъом этилган эди.

Понипат ва Қанва ёнидаги жангларда фаол қатнашган ва кейинги жангларда ҳам ҳаётини бир неча бор таҳлика остида қолдириб, ўзининг уддабурон сарбоз ва моҳир саркарда эканини намойиш қилган эди.

Ҳумоюнда яхшиликка миннатдорлик билан жавоб бериш ҳиссиёти юқори даражада эди. Кауза ёнидаги жангдаги муваффақиятсизликдан сўнг Ҳумоюн Ганг дарёсига ўзини отиб жон сақлаб қолганида уни сувга фарқ бўлишдан сақлаб қолган мешкобчи (сув ташувчи)га миннатдорлик белгиси сифатида уни бир кун Дехли таҳтига ўтқазиб қўйган эди.

Ҳумоюннинг юмшоқ табиатлигидан фойдаланмоқчи бўлган сарой аъёнларидан бири вазир Мир Али Халифа бошлиқ фитначилар бетоб ётган Бобуршоҳ ўрнига шоҳнинг куёви Зиёд Маҳди Хўжанни таҳтга чиқаришга уриниб кўришди. Бироқ фитна фош этилиб, таҳтни унинг қонуний вориси Ҳумоюн эгаллаган эди. Шундай кезларда ҳам

Ҳумоюн ўзига қарши турған укалари Комрон Мирзо ва Ҳиндол Мирзоларни ҳам бир неча бор авф этган эди.

Ҳумоюн инсон сифатида содиқ дўст, доно раҳбар, мафтункор ҳамсұхбат, сахий қалбли ва юқори маданиятли бўлса ҳам, лекин бу хислатлар шоҳ сифатидаги Ҳумоюннинг фазилатларини қониқарли тарзда тўлдира олмас эди. Унинг ана шу фазилатларидан баразли мақсадларда фойдаланган укалари ва уларга ҳамфикр бўлган сарой фитначилари ва қолаверса, Бобуршоҳ саройида хизмат қилиб унинг ички сир-асрорларидан хабардор бўлиб олган маккор Шершоҳ Сурусталик билан фойдаланиб, 1540 йилда уни Ҳиндистондан қувиб чиқаради.

Бироқ Эрон шоҳи Шоҳ Тахмасп ёрдамида 1555 йилнинг июнь ойида 15 йиллик қувфиндан сўнг Ҳумоюн яна Деҳли таҳтига юриш қилиб, уни рақиблардан тортиб олди. Тожу таҳти қайта кўлга киргач, Ҳумоюн ўз фаолиятини салтанат ишларини бутунлай қайта куришга ва ҳарбий тизимни яна-да такомиллаштиришга бағищлади. Бироқ салтанат таҳтида узоқ ўтириш унга насиб этмади. 1556 йилнинг 26 январида у ўзи қурдирган «Дин — Паноҳ» қасри кутубхонаси зина-поясидан тушиб келаётганда оёғи тойилиб йиқилди ва бош сяги ёрилиши натижасида ҳаётдан кўз юмди.

Вафотидан олдин у ўғли Ақбарни таҳт вориси этиб та-йинлади. Ҳумоюннинг феъл-автори ҳақида инглиз тарихчи-си Г. Маллесон щундай ёзади: «Ўзи жасур, сахий қалбли, ўтқир зеҳнли, ширин сўзли, чуқур билимли, юқори мада-ниятли, олижаноб ва шавкатли бўлса ҳам, давлатнинг мус-таҳкам пойдеворини яратиш учун Ҳумоюнда қатъият этиш- мас эди».

Шунга қарамай, Ҳумоюн кучли иродা кишиси эди. Омад-сизликлар унинг руҳини чўқтира олмасди. Эрон шоҳининг бир оз ёрдами билан Афғонистонни кўлга киритдию, би-ринчи бор қулай вазият пайдо бўлиши биланоқ ўзининг Ҳиндистондаги салтанатини жангари афғонлардан тортиб олди. Ҳинд тарихчиси доктор С. Райнинг ўринли таъкидла-шича, «Ўзининг юмшоқ табиатлилиги ва муваффақиятсиз-ликларига қарамай Ҳумоюн Ҳиндистон тарихида жуда му-ҳим ўрин эгаллайди, бироқ бу ҳолга ҳар доим ҳам тўла баҳо берилавермайди. Бобурийлар салтанатининг ўз вақтида қай-та тикланиши Ақбаршоҳнинг улкан империяси яратилиши-га йўл очиб берган бўлса, Ҳинд — Эрон муносабатларининг ривожланиши Ҳиндистон цивилизациясида узоқни кўзлаб кўрилган тадбир эди».

## АКБАРШОХ

Шоирлар даврасида Шекспир қандай мавқеда турса, дунё шоҳлари ичидан мен учун Акбар ана шундай мавқеда туради.

Сэр Уильям Слиман

### Акбаршоҳ ҳаётидаги муҳим саналар

- 1556 й. — Акбар Мирзо тахтга чиқди. Понипат ёнидаги жангда Хему қўшини тор-мор этилди.
- 1560 й. — Акбаршоҳ давлатни бошқариш тизгинини Байрамхондан тортиб олди.
- 1562 й. — Акбаршоҳ ҳинд рожаси Бихор Малнинг қизига уйланди.
- 1565 й. — Агра қалъаси пойдеворига тош қўйилди.
- 1569 й. — Шаҳзода Салим дунёга келди. Фотеҳпур Секри шаҳрини бунёд этишга фармон берилди.
- 1570 й. — Ҳумоюншоҳ мақбараси қуриб битказилди. Шаҳзода Мурод дунёга келди.
- 1575 й. — Гулбадан Бегим ҳаж сафарига жўнади.
- 1585 й. — Акбаршоҳнинг укаси Мирзо Муҳаммад Ҳоким вафот этди.
- 1599 й. — Шаҳзода Мурод оламдан ўтди.
- 1601 й. — Шаҳзода Дониёл Деккон ўлкаси ҳокими этиб тайинланди.
- 1602 й. — Шаҳзода Салим исён кўтарди.
- 1603 й. — Шаҳзода Салимнинг гуноҳлари кечирилиб, ота-бола ярашдилар.
- 1604 й. — Акбаршоҳнинг онаси Ҳамидабону Бегим ва Шаҳзода Дониёл вафот этдилар.
- 1605 й. — Акбаршоҳ бетоб бўлиб, 27 октябрда ҳаёт билан видолашди.

Тарихда «Буюк Акбар» номи билан машҳур бўлган Жалолиддин Муҳаммад Акбаршоҳ ҳақида сўз юритилганда унинг номи бобурий шаҳзодалар силсиласида алоҳида эҳтиром ила ҳурматланади.

Акбар 1542 йилнинг 15 октябрида, отаси Ҳумоюн қувфинда юрган пайтда, Ҳиндистоннинг Амарқот вилояти ҳокими рожа Вирсалнинг хонадонида дунёга келди. Эронга жўнаб кетиш олдидан Ҳумоюн Акбарни Кандаҳорда қолдиришига тўғри келди ва у З ёшга тўлгандагина отаси билан учрашиш имкони пайдо бўлди. Бироқ тақдир яна ота-болани ажратиб юборди. Акбар 5 ёшга тўлгандан кейингина отаси билан муқим бирга яшай бошлади.

Ҳумоюн ўғлиниң яхши маълумот олиши учун шароит яратиб бердию, бироқ ёш Акбарни саводхонликдан кўра отда чопиш, ов қилиш ва шунга ўхшаш жисмоний ўйинлар кўпроқ қизиқтирар эди. Отаси ҳаётлик пайтида Фазна ва Лоҳурда ҳукмдорлик қилиб, Ҳиндистон тарихида Сурлар сулоласидан бўлмиш Искандаршоҳдан қолган афғон тўдаларини қувиб юради. Отасининг тасодифий вафотидан сўнг унинг шахсий кўриқчиси бўлган Байрамхоннинг катта ёрдами туфайли 1556 йилнинг 14 февралида Панжоб яқинидаги Калонавр шаҳрида Ҳиндистондаги бобурийлар салтанининг шоҳи деб эълон қилинди.

Акбар саройидаги ҳарамда беш мингдан ортиқ аёллар истиқомат қиласиди. Уларнинг ҳар бири учун алоҳида хоналар ва хизматкорлар ажратилган бўлиб ҳар ойда салтанат хазинасидан уларга нафақа бериларди. Бундан ташқари уларнинг ҳар бири мавруди билан шоҳдан совға-саломлар ҳам олиб турардилар. Ҳарам тўрт қават ҳалқадан иборат кўриқчилар томонидан кўриқланарди. Ҳарам «ичкариси» маҳсус тайёргарликлардан ўтган садоқатли ва жиддий аёллар томонидан кўриқланарди. Ундан кейинги кўриқчилар ҳалқасида бичилган қуллар турарди. Улардан кейинги ҳалқада шоҳга садоқатли бўлган ражпут жангарилари, ва ниҳоят, ташқи ҳалқада «аҳади» навкарлари<sup>1</sup> кўриқчилик қиласидилар.

Европалик роҳиб Монсератнинг хабар беришича<sup>2</sup>, Акбарнинг уч юздан ортиқ хотини бўлган экан. Ушбу никоҳларнинг кўпчилиги дипломатик талаблар доирасида, салтанат манфаатини кўзлаб тутилган сиёсий иттифоқлар натижалари эди. Бундан ташқари ҳарамда подшоҳнинг қариндошлари, яқинлари ва хизматкорлари ҳам истиқомат қиласидилар. Хуллас, шоҳнинг нечта хотини ва қанча фарзандлари бўлганини айтиш қийин.

Акбаршоҳ тарихига бағишлиланган тарихий манбаларга қараганда унинг 13 та қонуний хотини бўлгани маълум. Абулфазл Алломий қаламига мансуб бўлган «Айни Акбарий» асарининг таржимони Г. Блокман Акбарнинг хотинлари сонини 7 та деб кўрсатган.

<sup>1</sup> Маҳсус тайёргарликдан ўтган ва фақат шоҳ буйруғи асосида ҳаракат қиласидиган миллий гвардия.

<sup>2</sup> Қаранг: Monseratte A., Father, The Commentary... on His Journey to the Court of Akbar. Translated by J. C. Hoyland, London, 1922, p. 202.

АҚШлик профессор С. М. Беркнинг тадқиқотларига кўра, Ақбарнинг биринчи хотини Руқия бегим бўлиб, у ўз амакиси Ҳиндол Мирзонинг қизи эди. Бу никоҳ Ҳиндол Мирzonинг қатл этилишидан кейинроқ 1551 йил ноябрь ойида бўлиб ўтган эди. Руқия Бегим эридан кейин яна йигирма йил яшаб 1626 йилда вафот этди. Ундан фарзанд туғилмади.

Кейинги никоҳ 1556 йилда Дехлида бўлиб ўтди. Бу аслида заминдорлар исёни иштирокчиларининг газабини тинчлантириш учун кўрилган сиёсий чора эди. Келин энг йирик заминдорлар сулоласининг вакили бўлмиш Жамолхоннинг гўзал қизларидан бири эди. Ақбарнинг учинчи хотини ҳам 1557 йилда Манкот қалъасини қамал қилиш жараёнида сиёсий битим сифатида никоҳга олинган эди.

Унинг тўртинчи хотини Салима Султон Бегим бўлиб, у Ақбар янги таҳтга чиққан йиллари унга оталиқ қилган Байрамхоннинг беваси эди. У Бобуршоҳнинг қизи бўлмиш Гулранг Бегим билан Мұҳаммад Нуриддин Мирзо ўртасидаги никоҳдан туғилган бўлиб, дастлаб Байрамхонга, унинг вафотидан сўнг, Ақбарга турмушга чиққан эди.

Бундан ташқари Ақбар яна тўртта ражпут (маҳаллий жангари ҳинд) шаҳзодаларининг қизларига ҳам уйланган. Бу никоҳлар, асосан ўша маликалар мансуб бўлган сулолаларга бўлган ҳурмат-эҳтиром белгиси сифатида тузилган сиёсий сулҳ рамзи бўлган эди.

1562 йилда Анбор вилояти рожаси Бахари Маллнинг қизига Биконар вилояти рожаси Рай Калян Маллнинг жиянига ва 1570 йилда Жайсалмор рожаси Равал Хар Райнинг қизига уйланди. 1575 йилда Дунгарпур вилояти рожасининг шахсий илтимосига кўра унинг қизини ҳам ўз никоҳига олди. 1564 йилда Хондош вилояти султони Мирон Муборакшоҳнинг қизига уйланди. Буларнинг барчаси сиёсий битимлар натижаси бўлган эди.

Ақбарнинг фарзандларига келсақ, бизга маълум шаҳзодалар Салим, Мурод ва Дониёлдан ташқари кўплаб фарзандлар туғилган, бироқ уларга узоқ умр кўриш насиб этмаган эди. Салимдан аввал 1564 йил октябрда Ҳасан-Ҳусан эгизак ўғиллар туғилган, бироқ улар бир чилласи чиқмай туриб дунёдан кўз юмганлар. Улардан кейин шоҳ учта қиз кўрган. Уларнинг каттаси 1569 йил ноябрда туғилган, унга Хонойим деб исм кўйғанлар, кейинги иккитаси Давлатшоҳ Бегим исмли маликадан туғилган.

Ақбар фарзандларини ҳаёт боғининг ёш ниҳоллари деб атарди ва уларни ардоқлаш яратган саховатли Парвардигор-

га шукроналик туйгусини ифодалашдир, деб ҳисоблар эди. У невараларини фарзандларидан ҳам аъло кўрар ва ардоқлар эди. Айниқса, шаҳзода Ҳусрав унинг энг ардоқли невараси эди. Шу боис бўлса керак, ўғли шаҳзода Салим отасига қарши исён кўтарган кезларда, тахт вориси қилиб невараси Ҳусравни тайинлаш фикрига ҳам келган эди.

Тахтга чиққандан кейинги дастлабки давр анча қийин кечди. Чунки отасининг Ҳиндистон тахтига қайтиб келтагина ҳали кўп вақт бўлмаган ва салтанат ишларини саранжомлаб ултурмай дунёдан кўз юмган эди. Кобул, Кандаҳор ва Бадаҳшонда бесаранжомлик ҳукм сурарди. Шимолий Ҳиндистоннинг каттагина қисми ҳали афон хонлари қўлида эди. Мевор, Амбор, Жайсалмор ва бошқа вилоятларда ражпутлар (маҳаллий жангари ҳинд ҳарбийлари) бош кўтариб турган эди. Сурлар авлодларидан яна бири бўлмиш Одилшоҳнинг вазири Ҳему эса қўшин тўплаб Дехли ва Агра атрофида тахти эгаллаш учун изғиб юради.

Ана шундай оғир вазиятда 14 ёшли Акбар Байрамхонни ўзига вазир этиб тайинлаб, унга «Хони хонон» унвонини берди. Шундан кейинги 4 йиллик давр асосан давлатни Байрамхон идора қилган давр бўлди. Байрамхон асли эронлик бўлиб, унинг отаси Сайфи Алибек Бобуршоҳ саройида эътиборли лавозимларда хизмат қилган эди. Унинг ўзи эса 16 ёшиданоқ Ҳумоюн хизматида бўлган эди. Байрамхон яхши саводли, маданиятли, беғараз ва оққўнгил киши эди. Шу билан бирга у жасур сарбоз ва қобилиятли саркарда бўлиб, Ҳумоюн олиб борган жангларда унга садоқат билан хизмат қилган эди. Унинг оқилона маслаҳатлари ва саъй-ҳаракати билан Акбар ҳали Панжобда эканида Дехлини эгаллаб олган Ҳему қўшини Понипат қишлоғи ёнида тор-мор этилди ва Дехли тахти тортиб олинди. Шу жанг шиддати билан Ажмор, Самбол, Лакнов, Гувалёр ва Жонпур вилоятлари ҳам қўлга киритилди.

Акбар давлат ишларини мустақил тарзда қўлга олгандан кейинги фаолияти ўз салтанати ҳудудини янада кенгайтириш билан боғлиқ бўлди. «Салтанат соҳиби ўз мавқени доимо мустаҳкамлаб бормоғи лозим. Акс ҳолда ғанимлари унга қарши қурол кўтарадилар», деб таъкидлар эди у. Акбарнинг асосий мақсади отаси Ҳумоюншоҳ салтанатига қарашли бўлган давлатларни қайтариб ўз салтанатига қўшиш ва унинг ҳудудини янада кенгайтириш эди. Унинг салтанати қисқа вақт ичидан шиддат билан кенгайиб борди. Бу ҳаракат 1536 йилдаётк отасининг ҳукумати тасарруфида бўлган Гу-

жарат вилоятини эгаллаш билан бошланди. 1572 йилда Акбаршоҳ Гужаратга юриш қилди, унинг қўшини Аҳмаднагарга етиб келганини эшишибоқ ҳоким Музаффаршоҳ жангсиз таслим бўлиб қалъани топширади.

Кейинги бир неча йиллар давомида бу вилоятда Акбаршоҳ ҳукуматини тан олишни истамайдиган исёнчиларнинг қўзғолонлари бўлиб турдию, лекин 1584 йилдан бошлаб бу вилоят тўлалигича Акбаршоҳ ҳукумати ихтиёрига ўтди. Бу вилоятнинг бўйсундирилиши Ҳиндистон жанубида ястаниб ётган бепоён Деккон ўлкасидаги майда хонликларни бўйсундириш учун йўл очиб берди. Шундан сўнг 1576—1580 йиллар давомида бўлиб ўтган ҳарбий юришлар натижасида Бенгал вилояти қўлга киритилди. 1585 йилга келиб Акбаршоҳнинг укаси Ҳоким Мирзо вафотидан кейин Кобул ҳукумати ҳам Акбаршоҳ тасарруфига ўтади. 1586—1587 йиллар мобайнида ҳинд қудаси лашкарбоши Бхагван Даҳ бошчилигидаги 5000 кишилик қўшин Кашмир ўлкасини эгаллаш учун юборилди. Қаттиқ жангдан сўнг Кашмир хони Юсуфхон таслим бўлди ва Кашмир вилояти Кобул хонлигига қўшиб олинди.

Акбаршоҳнинг бундан кейинги режаларида эронликлардан Кандаҳорни тортиб олиш нияти турар эди. Бироқ бу вилоятга ўтиш учун аввал Синд вилояти қўлга киритилиши лозим эди. 1591 йилда ўз ҳукумати қарамоғидаги Мўлтон вилояти ҳокими Абдураҳимхон (Байрамхоннинг ўғли)га Синд вилоятини эгаллаш вазифаси топширилди ва шу йилиёқ бу вилоят ҳам Акбаршоҳ ҳукуматини тан олишга мажбур бўлди. Шундан кейин бир оз вақт ўтгач, 1595 йилда Кандаҳор эронликлардан тортиб олиниб, Акбаршоҳ салтанатига қўшиб олинди. Шу билан Шимолий Ҳиндистон ҳудудидаги барча давлатлар бобурйлар салтанати таркибиغا киритилган эди. Эндиги навбат мамлакатнинг жанубидаги улкан ҳудудни эгаллаб ётган Деккон ўлкасидаги майда хонликларни бўйсундиришга келган эди.

1595 йилда лашкарбоши Абдураҳим хони хонон ва шаҳзода Мурод катта қўшин билан Аҳмаднагар вилоятини бўйсундириш учун юборилдилар. Қаттиқ жангдан сўнг ниҳоят қалъа таслим бўлди ва келишувга биноан бу вилоят Акбаршоҳ ҳукуматини тан олди. Бироқ асосий қўшин вилоятдан чиқиб кетгандан сўнг, Аҳмаднагар ҳукумати битим шартларига риоя қилишдан бўйинтовлай бошлади. Бундан фазабланган Акбаршоҳ 1600 йилда катта қўшин билан шахсан ўзи йўлга отланди. Йўлда Бурҳонпур қалъаси эгаллангач, шаҳ-

зода Дониёл билан лашкарбоши Абдураҳим хони хононни Аҳмаднагарни бостириш учун жўнатди. Орада бўлиб ўтган беаёв жангда 15000 аскар қиличдан ўтказилди ва қалъа таслим бўлди. Шу йўсинда 1601 йилда Асиргар қалъаси ҳам бўйсундирилиб, Хондеш вилояти ҳам Акбаршоҳ салтанатига қўшиб олинди.

Шундай қилиб, Акбар ўзининг 50 йиллик (1556 — 1605) ҳукмдорлик даврида Ҳиндистон шимолидаги отасидан қолган унча катта бўлмаган мамлакатни хорижда «Буюк Мўгуллар Империяси» номи билан танилган улкан салтанатга айлантириди ва уни моҳирона бошқариш тизимини яратди. Бу салтанат ўша пайтда Эрондан Бирмагача, Ҳимолай ва Ҳиндикуш тизмаларидан Годавари дарёси қирғоқларигача ястаниб ётар эди.

Ана шундай улкан империяни бошқариш тизимини ишлаб чиқиш, унинг амалда татбиқ этилиши, мамлакат узра бир хил маъмурий ва ҳарбий мансаблар ҳамда солиқлар тизимининг яратилиши, шунингдек, бир хил пул бирлигидан фойдаланиш тартибининг ўрнатилиши ва бошқарув идоралари иш фаолиятини ягона талаблар асосида назорат қилинишининг таъминланиши давлат бошлигининг бекиёс ақлзаковат ва кучли ирода эгаси эканидан далолат берib туриди. Гап шундаки, бу улкан империя таркибида яшовчи халқларнинг турмуш маданияти, урф-одатлари, дунёқараши ва диний эътиқодлари турлича бўлибгина қолмай, улар ўртасида ҳокимият учун тинимсиз курашлар бўлиб турар эди. Уларнинг барчасининг ижтимоий, иқтисодий, маданий ва диний эътиқодлари асосида келиб чиқадиган талабларини қондириш ва бир-бирига узоқ йиллар мобайнида душманлик муносабатларида бўлиб келган этник ва диний гуруҳларни муросага келтириш, уларни тинчлик ва осойишталиқда яшашини таъминлаш давлат бошлигидан жуда катта қобилият талаб қиласр эди. Акбаршоҳ эса айнан ана шундай ноёб қобилият эгаси бўлган буюк давлат арбоби ва лашкарбоши эди.

Акбаршоҳ ҳукмронлиги даврида ижтимоий ҳаётда қатор ислоҳотлар ўтказилди. Диний эътиқоди, мазҳаби ёки ирқи асосида камситилиб келинган маҳаллий ҳиндолар ва бошқа этник гуруҳларга ўз урф-одатларига риоя қилиш, исталган динга эътиқод қилиш имконияти яратиб берилди. Файридин ҳисобланган, яъни мусулмон бўлмаган маҳаллий миллат ва килларидан олинадиган «жузъя» солиги ва муқаддас қадамжоларини зиёрат қилганиклари учун олинадиган солиқлар

бекор қилинди. Мансабдорлар томонидан маҳаллий аҳолига ўтказиладиган тазиикларга ва камситилишларга чек кўйилди, мусулмон ва маҳаллий ҳинд болалари бир хил умумтълим мактабларида ўқиб, барча фанлардан бир хил дарслик-лардан фойдаланиш тартиби жорий қилинди. Маъмурий ва ҳарбий идоралардаги мансабларга мусулмонларгина эмас, балки маҳаллий ҳиндлардан ҳам тайинланадиган ва бир хил унвонларга тавсия этиладиган бўлди.

Ўз даврининг машхур уламоларидан бўлмиш Абул Фазл Алломийнинг «Айни Акбарий» асарида кўрсатилишича, ўша пайтдаги 137 сарой амалдори ва ҳарбий мансабдорлардан 14 таси ҳиндлардан эди, мамлакат таркибидаги 12 та вилоятнинг 8 тасида молия ишлари бўйича вазирлар ҳиндлардан тайинланган эди. Шунингдек, ҳиндларнинг фуқаролик ишлари бўйича баҳсли ишларини ҳал қилиш учун маҳаллий ҳиндлардан қозилар тайинланадиган бўлди. Ҳиндларга нисбатан бўлган бегараз муносабат Акбаршоҳ фаолиятининг дастлабки пайтларидаёқ сезилган эди. 1562 йилда у ўзи Жайпур вилояти рожаси ҳинд Бехор Малнинг қизига уйланган эди. 1570 йилда ўғли шаҳзода Салимни ҳам Биконар ва Жайсалмор вилоятларининг ражпутлардан бўлган ҳокимларининг қизларига уйлантирган эди. Урнатилган кудачилик муносабатлари асосида рожа Бхагван Дас ва Ман Сингхлар масъулиятли маъмурий ва ҳарбий лавозимларга тайинланган эдилар. Ҳарбий лавозимдаги ҳиндлар жанговар юришлар давомида энг масъулиятли жойларга юборилар ва улар подшоҳ салтанати қурратининг мустаҳкамланишига ўз ҳиссасини қўшаётганидан фуурланишар эди. Жанг майдонларида ражпутлар жон-жаҳди билан жангга киришар, қаҳрамонлик ва подшоҳга садоқат намуналарини кўрсатар эдилар.

Маҳаллий ҳиндларнинг турли сабабларга кўра камситилишига чек кўйилиши маҳаллий ҳалқ назарида Акбаршоҳнинг обрўсини ошириб юборган эди. Унинг буйруфига биноан пойтахтда маҳсус таржимонлик муассасаси ташкил қилиниб, унда ҳинд тилидаги диний китобларни форс тилига таржима қилиш ишлари йўлга кўйилди. Христиан динига эътиқод қилувчилар учун ҳам 1603 йилда маҳсус фармон орқали ўз динига сифинишларига рухсат этилди. Бундан аввалроқ урушда асир тушганларга мусулмон динини мажбуран қабул қилдириш тартибини бекор қилиш ҳақида фармон чиқарилган эди. Ҳиндларнинг сигирларга нисбатан бўлган диний эътиқодини ҳисобга олган ҳолда, мол гўштини истельмол қилишга йўл кўйилмас эди. 1583 йилдан эътиборан

ҳафтанинг маълум кунларида айрим ҳайвонларни сўйиш ва уларнинг гўштини истеъмол қилишни тақиқловчи тартиблар ўрнатилган эди. Айрим маълумотларга қараганда 1590 — 91 йилларда хўкиз, қўтос, эчки, қўй, от ва туя гўштини истеъмол қилиш тақиқлаб қўйилган эди. Маҳаллий ҳиндулар билан мусулмонлар ўртасидаги ғанимлик муносабатларини илитиш мақсадида Акбаршоҳ шахсан ўзи ҳиндуларнинг *Raxi*, *Денавали*, *Шиваратри* деб аталган байрамларида ҳам иштирок этиб туар эди.

Акбаршоҳ ҳукмронлиги даврида ҳиндулар учун қулай имкониятлар яратилибгина қолмай, уларнинг диний қарашлари ва урф-одатларидаги файриинсоний одатларига риоя қилишга ҳам чек қўйилди. Жумладан, вояга етмаган болаларни уйлантириш ва турмушга бериш ман этилди, эри ваддат этган аёлларни эрининг жасади билан бирга қўшиб оловда куйдирилишига чек қўйилди, бева аёлларнинг қайта турмуш қуришларига рухсат берилди.

Ҳукмдор мусулмонлар ва маҳаллий раият вакиллари бўлмиш ҳиндулар ўртасида муросасозлик қилиш, ўзаро ҳурмат муносабатларини тиклаш ва тинч-тотув яшашларини таъминлаш мақсадида амалга оширилган бу тадбирий чоралар Акбаршоҳ салтанатининг тобора кенгайиши ва ҳар томонлама мустаҳкамланиши ҳамда узоқ йиллар гуллаб яшшини таъминловчи омиллар бўлди.

Акбар ўзининг ҳукмдорлик фаолияти давомида олиб борилган сиёсати таҳлилидан шу нарсани хulosса қилиш мумкинки, унинг асосий мақсади Ҳиндистон ярим ороли ҳудудидаги майда давлатларни бирлаштириб марказдан бошқариладиган улкан империя ташкил қилиш эди. Шу боис атрофидаги қудратли қўшни давлатлар билан муттасил дипломатик алоқалар ўрнатган эди. Эрон билан Мовароуннаҳр Акбар салтанатига ҳудудан яқин тургани боис, Акбарнинг давлатни бошқариш сиёсати учун улар муҳим аҳамият касб этарди. Шу боис Акбар бир неча бор элчилар юбориб улар билан яхши дипломатик алоқада бўлиб турди.

1577 йилда Шоҳ Тахмасп вафотидан кейин Абдуллахон Акбарга биргаликда Эронни маҳв этишни таклиф қилди. Агар бу юриш амалга ошса Эрон бировга таҳдид қилиши мумкин бўлган мустақил давлат сифатида ўз мавқеини йўқотган бўларди.

Абдуллахонга ёзган хатида Акбар унинг таклифини икки муҳим сабаб туфайли қўллаб-қувватлай олмаслигини айтганди: биринчидан, сафавийлар шиа мазҳабига итоат этса-

лар ҳам, улар Пайғамбар саллоҳу алайҳи вассалам авлодига мансублиги билан ҳурматга сазовор кишилар бўлса; иккинчидан, Эрон билан Ақбарнинг ота-боболари ҳам қадимдан яхши дўстлик ришталари билан боғланганлиги билдирган эди.

1585 йилда Абдуллахон Эронни биргаликда маҳв этиш режаси билан Ақбарни яна ҳамкорликка чақириб, унга тазиик ўтказишга ҳам уриниб кўрди. Бу сафар Ақбар ўзининг Эрон хавфсизлигини сақлашга мойил эканини анча аниқ билдириди. Бунда у турк султони отаси ва бобосининг Эрон шоҳлари билан илгари тузган битимларига қарамасдан, Эроннинг ҳозирги кундаги тант ҳақволидан фойдаланиб, уни маҳв этиш учун қўшин юбораётганига ишора қилиб, бундан газабга келганини билдириди. Шу билан Ақбар Эрон шоҳини ҳимоя қилиш учун отланмоқчи эканини билдириб, Абдуллахонни Хуросонда учрашишга ва ўша учрашувда Эрон ҳукмдорига қай тарзда ёрдам бериш ва ҳимоя қилишлари масаласини муҳокама қилишга чақириди.

Шунингдек, эронийлар суннийлик мазҳаби ўрнига шия мазҳаби кўрсатган йўлдан бориши танлаган бўлсалар ҳам, ҳар қалай, улар Пайғамбар саллоҳу алайҳи вассалам авлодидан эканига яна бир бор ишора қилди. Бу билан Ақбар Абдуллахонга, бордию, у Эронга юриш қилгудай бўлса, Ақбар Эрон шоҳи ҳимоясида бўлиши мумкинлигига ишора қилиб қўйган эди.

1591 йилда Эрон шоҳи Шоҳ Аббос ўзбеклардан Хуросонни тортиб олиш мақсадида Туронга юриш қилганда Ақбардан унга ҳамкорлик қилишини сўраб илтимос қилганди ҳам. Ўшанда Ақбар ўзбеклар билан дўстона тинч-тотув яшаш ҳақида бир неча бор тузилган битимларга ишора қилиб, эҳтиёткорлик билан бу босқинчилик юришидан ўзини тийганди.

Кашмирга қилинган биринчи ва учинчи бор юришлар давомида Ақбар қўшни мамлакатлар ҳукмдорлари билан алоқа ўрнатиш имконига эга бўлганди. 1585 йилда у Кичик Тибетга ва Катта Тибет (Ладах)га дипломатик миссия билан элчилар юборди. Бир неча ойдан сўнг улар бу мамлакатларнинг элчилари ва совға-саломлари билан сафардан қайтиб келдилар.

Орадан икки йил вақт ўтгач, Кичик Тибет ҳукмдори Ақбарнинг розилигини олиб шаҳзода Салимга ўз қизини хотинликка тортиқ қилди. Шу орада Қашқардан қайтиб келган элчиларга қўшиб бу иккала мамлакатга ҳам янги элчи-

лар гурухи юборилди. 1599 йилда Акбар Лохурдан Аграга қайтиб келганда Қашқардан яна бир гуруҳ элчилар келди. Қашқарга юборилган элчилар сафарларини давом эттириб Хитойгача бориши режалаштирилган эди, чунки анча вақтдан бүён бу мамлакатдан ҳеч қандай хабар бўлмаган ва бу юргни ким бошқараётгани ҳақида ҳам ҳеч қандай маълумот йўқ эди. Бироқ бу режалар номаълум сабабларга кўра амалга ошмай қолди.

Акбаршоҳнинг диний эътиқодига келсак, у сунний мазҳабдаги жуда тақвадор мусулмон бўлиб, беш маҳал намозни ҳеч канда қилмас ва намозларнинг қисқартириб ўқилишига ҳам йўл қўймас эди. Шунингдек, бошқа дин ва мазҳабдаги фуқароларнинг ўз эътиқодига риоя қилишларига монелик қилинишига ёхуд камситилишига ҳам ҳеч йўл қўймас эди. Ўзини ҳинд хотинларининг ҳам ўз дини ва мазҳабига сифинишлари ва урф-одатларига риоя қилишларига ёхуд диний маросимларни ўтказишларига монелик қилмас эди.

Акбаршоҳнинг диний қарашлари ҳаёти давомида янада бойиб борди. Унинг диний эътиқодидаги ривожланиш ва ўзгаришларда ўша даврнинг етук уламоларидан бўлмиш Шайх Муборак ва унинг ўғиллари Абул Фазл ҳамда Абул Файзларнинг таъсири катта бўлди. Улар бошқа динларнинг ҳам ижобий томонларини ўрганиш ва ҳисобга олишни тарғиб қиласар эдилар. Бу ҳол эса ўта фанатик руҳдаги Шайх Маҳдум-ул-мулк, Шайх Абдунаби каби ашаддий мусулмончилик тарафдорларининг дунёқарашларига мос келмас эди. Акбаршоҳ Шайх Файзи ёрдамида тарих, фалсафа, дин тарихи ва табиий фанларни ўрганди ва шу асосда ўзининг шахсий хуносаларига таяниб, динга нисбатан янгича қарашларини баён қилди. Бошқача айтганда, барча динларнинг ижобий томонларини ўзида мужассамлаштирган янгича руҳдаги «диний-илоҳий» деб аталган таълимот яратди. Кейинроқ ўзининг ана шу қарашлари асосида Фотеҳпур Секри (Голиблар шаҳри) шаҳрида бунёд этилган ибодатхонада турли дин ва мазҳабларнинг етук билимдонларини тўплаб, улар билан турли мавзуларда тенг ҳуқуқли баҳс ва мунозаралар ўтказиб турар эди. Бу мунозараларда мусулмон динининг турли мазҳаблари вакиллари, насроний (христиан)лар, браҳманизм, жайнизм ва зардуштийлик каби диний оқимлар вакиллари бемалол иштирок этишлари ва баҳс юритилаётган мавзууда ўз фикр-мулоҳазаларини баён этишлари мумкин эди.

Акбаршоҳ бу ерда тингланган маъruzalарнинг мағзини чақиб, уларнинг ижобий томонларини умумлаштирас ва ўзи-

нинг сиёсий ва маънавий билимларига таянган ҳолда ўз ху-  
лосаларини янги таълимотида баён қилар эди. Унинг бу на-  
зарияси дин уламолари ўргасида шунчалик катта обрў қозон-  
дики, 1579 йилда Шайх Муборакнинг ташаббуси билан Ак-  
баршоҳ диний уламолар томонидан «мужтаҳид», яъни *ислом*  
*масалалари бўйича олий ҳакам* деб эътироф этилди ва унга  
«И моми одил» унвони берилди. Унга берилган ёрлиққа ўша  
даврнинг энг етук дин пешволаридан бўлмиш **Махдум-ул-**  
**мулк**, Шайх Абдунаби, Шайх Муборак ва бошқа таникли  
уламолар имзо чекиб тасдиқлаган эдилар.

Бу хужжатда Акбаршоҳ *«Ислом дунёсининг подшоҳи, му-*  
*сулмонларнинг Амири, Аллоҳнинг ердаги сояси Абул Фотиҳ*  
*Жалолиддин Муҳаммад Акбар Подшоҳи Фозий Аллоҳнинг энг*  
*садик қули, энг одил ва энг доно подшоҳдир»*, деб тан олин-  
ган эди. Ана шундай улуғ мартаба эгаси бўлишига қарамай  
Акбаршоҳни камтарлик туйфуси тарқ этмаган эди. Кўпинча  
атрофидаги тақводорлар унга эргашиб, ўзларига пир бўли-  
шини илтимос қилишганда, у камтарлик билан *«Мен ўзим*  
*пирга муҳтож бўлиб турганим ҳолда қандай қилиб сезларга*  
*пир бўла оламан»*, дея жавоб берар эди. Отаси умрининг охи-  
ригача уламо, камтарин, художўй инсон ва содик мусул-  
монлигича қолгани ҳақида унинг фарзанди Жаҳонгир ҳам  
ўз хотираномасида алоҳида таъкидлаб ёзган. Унинг айтиши-  
ча, Акбаршоҳ кўпинча: *«Табиатда бўшлиқ жойнинг бўлиши*  
*ҳақида гап бўлиши ҳам мумкин эмас, Аллоҳ ҳар жойда ҳозиру*  
*нозирдир. Яратувчи Аллоҳ билан яралмиш банда ўргасида тил*  
*билан изоҳлаб бўлмайдиган боғлиқлик бор»*, деб таъкидлар экан.

Акбаршоҳнинг хукмдорлик фаолияти ва шаҳсий феъль-  
атвори ҳақида ўзининг замондошлари ҳам, кейинги давр  
тариҳчилари ҳам ноёб фикрларни билдирганлар. Унинг са-  
райидаги етук уламолардан бири бўлмиш Абул Фазлнинг  
«Айни Акбарий» ва «Акбарнома» асарларида ҳамда таҳт во-  
риси Жаҳонгирнинг «Тузуки Жаҳонгири» асари ҳамда қатор  
хорижий сайёҳларнинг битикларида Акбаршоҳ ҳақида қим-  
матли фикрларни учратиш мумкин.

Жаҳонгирнинг таърифлашича, Акбаршоҳнинг қадди-  
қомати улуғвор кўринишга эга бўлиб, бўйи ўрга бўйдан сал  
юқорироқ, юзи буғдойранг, қош-кўзлари қора, танаси  
тўқроқ рангда, кўкраклари кенг, қўл ва билаклари узун,  
арслон келбатли киши эди. Бурнининг чап ёнида нўхатнинг  
ярмича келадиган, ўзига жуда ярашиб турадиган холи бор  
эди. Ўша давр башоратчиларининг талқинига кўра, бу хол  
ўз эгасига улкан омад ва юқори мартаба келтирас эмиш.

У гапираётганда салобатли овози янада улуғвор ва таъсирчан тус олар эди. Унинг хатти-ҳаракати ва юриш-туришини кузатган киши ҳақиқатан ҳам у Аллоҳнинг суюкли бандаси эканига шубҳа қилмас эди. «Мұхтарам падари бузрукворимизнинг олижаноб хислатлари мақтөв доирасидан ҳам тошиб чиқар эди. Агар у ҳақда ёзилган асарларда унинг мақтөвини ўринлатиб таърифлаган бўлсалар, отага фарзанд назари билан эмас, балки холисона назар билан қаралганда ҳам унинг мақтөвлари рисоладаги меъёрдан ортиб тушган бўлар эди», деб ёзган эди Жаҳонгиршоҳ.

Ўша пайтда миссионер (дин тарғиботчиси) сифатида шоҳ саройига таклиф этилган христиан роҳибларидан бири шундай деб ёзган эди: «У ҳақиқатан ҳам буюк шоҳдир; у ҳамма учун севимли шоҳ бўлиб, ҳар бир фуқаро унинг ғамхўрлигини сезиб турарди; у сарой азёнларига самимий, қўйи табақадагиларга шафқатли назар билан қарар, кўпинча эса, табақаси ва диний эътиқодидан қатъи назар, ҳаммага бир хил назар билан қарар эди. У худодан қўрқиб яшар, беш маҳал намозни канда қилмас, ўзининг қанчалик банд бўлишига қарамай, намозларнинг ҳеч қисқартирилмай тўла ўқилишига риоя қиларди... Адлия ишлари борасида эса жуда адолатли ҳукмдор эди. Бирор жиноятчи адлия идоралари томонидан ўлим жазосига ҳукм қилинган бўлса, ушибу ҳукм учинчи бор қайта чиқарилмагунча уни ижро этмаслик тартибини жорий этган эди. Маҳкумни оқловчи омиллар исботланган ҳолларда уни афв этар ва бу ҳолдан жуда-жуда қувониб кетар эди».

Деҳлида яшаган христиан миссионерларидан яна бири роҳиб Монсератнинг ёзишича, «унинг юзидан нур ёғилиб турганидан биринчи қарашдаёқ шоҳ эканини шоҳлик либосларисиз ҳам сезиб олиш мумкин эди. Елкалари кенг, болдиrlари бир оз эгилганилигидан унинг чавандозлик машқларида кўп чиниқсанни сезиб олиш мумкин эди. Бадани тўқроқ бугдой рангда бўлиб, бошини ўнг елкаси томон бир оз ташлаб юради, қошлиари қалин, кўзлари худди қуёшда ярқираётган денгиз сувидек ялтираб чақнаб туради. Шимолий осиёликлар ёхуд хитойликлар сингари қовоқлари ингичкароқ, киприклари қалин, бурни ўртача ҳажмда бўлиб, ўртаси дўнгроқ, учи бир оз пастга эгилиб турарди. Бурун катаклари кенг, чап катаги ёнида юқори лаби билан туташиб кетган холи бор эди. Балогат ёшидаги туркӣ йигитлар сингари мўйлов қўйиб, соқолини доим қирдириб юрап эди. Ота-боболаридан фарқли ўлароқ сочини устарада қирдирмас, қалпоқ ҳам киймас эди. Айтишларича, ҳинд одатига тақлид қилган ҳолда салла ўраб юрап эди. Оёғи жароҳатланмаган бўлса ҳам, худди оқсоқ кишидек чап оёғини

*бир ғз силтаб босар эди. Кулганда юз тузилиши ўзгариб кетарди, хотиржам бўлган ҳолатда эса юзидан аслзодаларга хос донолик нури ёғилиб турар эди. Газабланганда эса яна ҳам улуғвор бир қиёфага кирап эди».*

Тарихнавис Ду Жаррикнинг ёзишича, арздорларнинг шикоятларини ҳафсала билан тинглар, имкон борича уларнинг илтимосини қондириш пайида бўлар эди. Оддий фуқаронинг арзимас совғаларини ҳам катта хурсандлик туйғуси билан қабул қиласар, баъзан эса бағрига босиб ҳам кўяр эди. Ваҳоланки, айрим амалдорларнинг қимматбаҳо совғаларини ҳам бунчалик миннатдорлик билан қабул этмас, айрим ҳолларда эса уларга эътибор ҳам бермас эди.

У жуда саховатли ва бағри кенг инсон эди. Ота-онаси ва қариндошлари олдидаги бурчларига мастьулият ҳисси билан қарап эди. Укаси Ҳоким Мирзо унга жуда кўп ташвишлар орттириб берган бўлса ҳам, унга ҳам саховат назари билан қарапарди. Тилаб олган ўғли Салимни жуда севар эди, исён-корлигига қарамай унинг гуноҳларини бир неча бор афв этган эди. Ҳиндистон тарихида чуқур из қолдирган бу улуғвор шахс табиатидаги бундай ноёб хислатлар ҳар биримиз учун ўрнак бўлгусидир.

## ЖАҲОНГИРШОҲ

### Жаҳонгиршоҳ ҳаётидаги муҳим саналар

**1605 й.**

3 ноябрь — Отаси таҳтини эгаллади.

**1606 й.** — Шаҳзода Ҳусрав исён кўтарди. Алиқулибек «Шер Афон» қатл қилинди.

**1607 й.** — Алиқулибекнинг беваси Мехринисо ва қизи Лодила шоҳ ҳузурига келтирилди.

**1611 й.**

май — Жаҳонгиршоҳ Мехринисога уйланди.

**1618 й.** — Доҳад шаҳрида шаҳзода Аврангзеб дунёга келди.

**1622 й.** — Шаҳзода Ҳуррам исён кўтарди.

**1626 й.** — Шоҳ ва Малика Нур Жаҳонни лашкарбоши Маҳобатхон ҳибсга олди.

**1627 й.**

28 октябрь — Жаҳонгиршоҳ ёруғ дунёдан кўз юмди.

Ҳиндистон халқларининг маданий ҳаётида бўлиб ўтган ижобий ўзгаришларга улкан ҳисса қўшган бобурий шаҳзодалар силсиласида Бобуршоҳнинг чевараси, Ҳумоюншоҳнинг невараси, Акбаршоҳнинг ўғли бўлмиш Жаҳонгиршоҳ

алоҳида мавқеда туради. У давлатни идора қилиш, халқнинг турмуш шароитини яхшилаш, меъморий обидалар бунёд этиш, боғ ва гулзорлар барпо этиш ҳамда тасвирий санъатга, умуман, гўзаликка бўлган иштиёқи билан ўзидан аввал ўтган бобурий шаҳзодалар даврасида алоҳида виқор билан кўзга ташланиб туради.

Жаҳонгирнинг асли исми Муҳаммад Салим бўлиб, у Акбарнинг Аллоҳдан тилаб олган ўғли эди. Бобоси Бобуршоҳ сингари шаҳзода Акбар ҳам отасининг тасодифий ўлимидан сўнг 14 ёшидаёқ (1556 й.) тож кийиб тахтга чиққан эди. Эрта уйланган бўлишига қарамай, у анчагача ўз тахтига ворис бўлиши мумкин бўлган ўғил фарзанд кўрмади. Ёши йигирма еттига тўлганда ўша даврнинг машхур авлиё ва шайхларининг Аллоҳга қилган илтижо ва дуоларидан сўнгтина 1569 йилда Акбаршоҳ ўғил кўрди. Унга Аллоҳдан ўғил фарзанд тилаб берган ажмерлик шайх Салим Чештийдан миннатдорлик белгиси сифатида тилаб олинган шаҳзодага Муҳаммад Салим деб исм кўйдилар. Подшоҳ отаси уни баъзан эркалатиб «Шайх Бобо» деб ҳам атар эди.

Тилаб олинган фарзанднинг рисоладаги йигит бўлиб улфайиши учун зарур бўлган барча шароит муҳайё қилинди: шаҳзода 4 ёшга тўлиши биланоқ ўша даврнинг кўзга кўринган фозилу фузалолари унга форс, араб, туркий ва ҳинд тилларидан, шунингдек, арифметика, жўкрофия, тарих ва бошқа фанлардан сабоқ бера бошладилар. Муаллимларнинг етакчи устози «Тузуки Бобурий»нинг биринчи таржимони, ўз даврининг етук уламоларидан бўлган Абдураҳим «Хони хонон» эди.

Отасининг куйиб-пишиши, тинмай ғамхўрлик қилишларига қарамай, тилаб олинган шаҳзода анча эркатой йигит бўлиб ўсида ва ўз ёшига хос бўлган барча номаъқулчиликлардан тотиб кўрди. Бу ҳолдан чўчиган Акбаршоҳ шаҳзодани 15 ёшга киргандаёқ Амбор вилояти ҳокими Бҳагван Даcнинг гўзал қизига унаштириб қўйди ва 1586 йилнинг февраль ойида катта тантана билан шаҳзода Салим уйлантирилди. Ана шу биринчи никоҳдан шаҳзода Хусрав дунёга келди.

Ахлоқан анча енгилтак ва майшатга анча ружу қўйган шаҳзода Салимни бу номаъқул йўлдан қайтариш учун отаси кўп уринди-ю, бироқ кўзлаган мақсади ҳосил бўлавермади. 1602 йилда отаси Акбаршоҳ Деккон ўлкасидаги Асиргар қалъасини қамал қилиш учун ҳарбий юришга кетганида «подшоҳликни кутавериб тоқати тоқ бўлган» шаҳзода Салим пойтахтда исён кўтариб, ўзини «шоҳ» деб эълон

қилди. Бундан хабар топган Акбаршоҳ бебош ўғлига дўқ-пўписалар қилиб, бундай бемаъни ишни бас қилишини талаб этди. Бироқ бу чора кутилган натижани беравермагач, Аграга қайтиб келишга мажбур бўлди. 1602 йилда шаҳзода Салим ўзининг навбатдаги исёнини бостириш учун подшоҳ Акбарнинг буйруғига биноан Деккондан келаётган лашкарбоши Абул Фазлни ўлдиртириш билан яна бир бор отасига қаттиқ руҳий азоб берди. Чунки Абул Фазл Алломий моҳир саркардагина бўлиб қолмай, ўз даврининг машҳур олимни ҳамда Акбаршоҳнинг яқин дўсти ва маслаҳатгўйи эди. Бобурий шаҳзодалар тарихини ёритишга бағишлиланган «Акбарнома», «Айни Акбарий», «Иншои Абул Фазл», «Руқъати Абул Фазл» каби нодир асарлар унинг қаламига мансуб эди.

Ўғлиниң мана шундай хурмача қилиқларидан дили оғриган Акбаршоҳ ўғли Салим ўрнига невараси шаҳзода Хусравни тахт вориси этиб тайинлаш фикрига ҳам келган эди. Чунки шаҳзода Хусрав феъл-автори ва яхши хулқи, покиза турмуш тарзи билан саройдагиларнинг хурматини қозонган эди. Отасининг бу фикридан хабар топган Салим пойтахтга келиб отасининг оёғига йиқилиб, ўз қилмишлари учун ундан узр сўради. Узоқ давом этган музокаралардан сўнг Акбаршоҳ бебош ўғлиниң гуноҳларини афв этди, чунки 1604 йилда Акбарнинг иккинчи ўғли шаҳзода Дониёл вафот этган бўлиб, тахт ворислигига фақатгина Салим номзод бўлиб турган эди. 1605 йилниң октябрь ойига келиб Акбаршоҳнинг соғлиғи ёмонлаша бошлади ва анча тортишувлардан кейин, у подшоҳлик тожини ўғли Салимга кийдириб, уни тахт вориси деб эълон қилди. Бу воқеа 1605 йилниң ноябрь ойида бўлиб ўтган эди.

Тахтни эгаллагач, шаҳзода Салим ўзини «Жаҳонгир» деб эълон қилди-да, давлатни идора қилишда қатор ислоҳотлар қилишга киришди. Жумладан, ўз номи ўйиб ёзилган танга пул зарб қилдириди, зинданбанд ётган жуда кўп маҳбуслар озод қилинди, шунингдек «тамға», «мир баҳри» деб аталган солиқ турлари бекор қилинди. Мамлакат ҳудудида маъмурият рухсатисиз дўкон очиш ва савдо қилиш ман қилинди, мусаллас ва гиёҳвандлик моддалари тайёрлаш ва улар билан савдо қилиш қатъиян тақиқланди. Маъмурий мансабдор шахсларнинг ўзбошимчалик билан уй-жой ва экин экиладиган майдонларни эгаллаб олишлари ва ўз қўл остидаги фуқаронинг қизларини хотинликка олишларига чек қўйилди. Жиной жавобгарликда айблангандарнинг қулоқ ва бурунла-

рини кесиб жазолаш чораси ҳам бекор қилинди. Карвон йўллари бўйига қудуқлар қазиши, масжид ва карвонсаройлар қуриш ҳамда bemorlarни даволаш учун хукумат қарамоғида турадиган шифохоналар ташкил этишга фармон чиқарилди. Шунингдек, йилнинг маълум кунларида ҳайвонларни сўйиши ва улар гўштини истеъмол қилишни ман этувчи тадбирлар белгиланди. Мансабдор марҳумларнинг молмулкини унинг меросхўрига бериш<sup>1</sup>, меросхўри бўлмаган ҳолларда эса, унинг мулкини ҳалқ оммаси учун хизмат қилалиган иншоотлар (масжид, мадраса, ҳаммом, кўприклар қуриш, ариқлар қазиши) ишларига сарфлаш тартиби ўрнатилди, шунингдек, амалдорлар ва мулкдорлар ҳам бир қатор кўрикдан ўтказилди.

Жаҳонгиришоҳнинг буйруғига биноан Агра қалъасининг Шоҳ Буржидан Жамна дарёси қирғогигача етадиган қилиб соғ тилладан қўйилган «Адолат занжири» тортилиб, дарё бўйига қурилган шоҳсупага бу занжирнинг бир учи боғлаб қўйилди. Мансабдорлар ёки оддий фуқаро томонидан таҳқирланган ёхуд озор етказилган шахслар ана шу занжир кўнғироқларини чалиш билан подшоҳдан адолат талаб қилишлари мумкин эди. Бу занжир ҳақида Жаҳонгир ўзининг «Тузуки Жаҳонгирий» деб аталган хотираномасида шундай деб ёзади: «Занжир соғ олтиндан қўйилиши, унинг узунлиги 30 газ бўлиши ва унга 60 та қўнғироқ осиб қўйилиши ҳақида фармон чиқардим. Занжирнинг оғирлиги Ҳиндистон ўлчови билан 4 ман, Ироқ ўлчови билан эса 32 манга тенг бўлди». Бу занжирни қўйиш учун шоҳ хазинасидан 300.000 рупий маблағ сарфланган эди.

Жаҳонгир таҳтга чиққандан кейин кўп вақт ўтмаёқ (1606 йилда) бобоси Акбаршоҳнинг меҳрини қозонган ва унинг муруввати билан таҳтга умидвор бўлиб қолган ёш шаҳзода Ҳусрав подшоҳ отаси Жаҳонгирга қарши исён кўтарди. Бобоси Акбаршоҳ қабрини зиёрат қилиб келиш баҳонасида у 350 навкари билан Аградан чиқиб кетди. Улар Мадура қалъасига етиб келганларида 3000 суворийси билан Ҳусайнбек, Лоҳур қалъаси девонбеги Абдураҳим ҳамда таронлик йирик дин пешволаридан бўлмиш Гурӯ Аржун ҳам уларга қўшилди ва улар биргаликда Лоҳур қалъасини қамал қилдилар. Бу воқеадан хабар топган Жаҳонгир катта қўшин билан бу ерга

<sup>1</sup> Бунга қадар мавжуд тартибга кўра мансабдорларнинг молмулки унинг вафотидан кейин давлат ихтиёрига олинар эди.

етиб келди ва Байровал қалъаси ёнидаги қаттиқ жангда исён-чилар қўшини тор-мор қилинди.

Хафсаласи пир бўлган мағлуб шаҳзода ўз тарафкашлари билан Кобулга қараб йўл олди, бироқ Ченоб дарёсини ке-чиб ўтишаётгандада улар кўлга олиниб, шоҳ Жаҳонгир ҳузурига келтирилдилар. Аянчли ҳолати ва кўзёшларига қарамай ўз отаси таҳтига кўз олайтирган шаҳзода Хусрав кишанланниб, зинданбанд қилинди. Унинг шерикларига ва ҳомийла-рига ҳам жазо чоралари белгиланди. Бу ҳақда Жаҳонгир ўзи шундай деб ёзади: «*Мен Хусравни зинданга ташладим, ёни-даги иккала ярамас шерикларининг бирини сигир терисига, иккинчисини эса эшак терисига ўраб эшакка тескари минди-риб шаҳар кўчалари бўйлаб сазойи қилдирдим*». Шаҳзодага ҳомийлик қилиб, унинг қўшинини маблағ билан таъминла-ган авлиё Гуру Аржун ҳам жазосиз қолмади: у ўлимга маҳ-кум этилиб, молу мулки мусодара қилинди.

1607 йилда Жаҳонгир ўзига қарши суиқасд уюштирила-ётгани ва зинданбанд шаҳзода Хусравни таҳтга чиқариш режаси тузилаётганидан хабар топиб қолди. Фитна ташки-лотчилари дарҳол қатл этилиб, шаҳзода Хусравнинг кўзига мил тортиш ҳақида буйруқ берилди<sup>1</sup>. Шунга қарамай, шаҳ-зоданинг бир кўзи кўриш қобилиятини қисман сақлаб қол-ган эди. 1616 йилгача Хусрав пойтахтда ҳибсда сақланди, 1620 йилга келиб уни унчалик хуш кўрмайдиган укаси ки-чик шаҳзода Хуррам ихтиёрига берилди, 1622 йилнинг март ойида шаҳзода Хусрав қатл қилинди.

Хусравнинг қатл этилиши ҳақида сарой тарихчиларидан бири шундай ёзади: «*Ҳукмдорлар учун уларнинг мавқеига раҳ-на солиши мумкин бўлган оға-иниларнинг бу ёруғ дунёда бўлмас-лиги зарур бир ҳолдир. Таҳтга даъвогар бўлиши мумкин бўлган шахсларнинг таг-томири билан тугатилиши зарурлиги ҳақидаги маслаҳат подшоҳга етказилгач, Хусрав зиндан азобларидан қутулиб боқий дунёга равона қилинди*»<sup>2</sup>.

Шаҳзода Хусрав оддий фуқаро ва сарой аъёnlари ораси-да катта обрў қозонган эди. Акбаршоҳнинг бадхулқ ўғли Салимнинг ўрнига унинг ўғли (шаҳзода Хусрав)ни таҳт вори-

<sup>1</sup> Сарой қоидасига кўра кўзи ожиз шахслар таҳтга даъвогар бўлиш хуқуқидан маҳрум эдилар. Шу боис бўлса керак, акаси Ҳумоюн билан таҳт талашган шаҳзода Комрон Мирзонинг ҳам кўзига мил тортилган эди.

<sup>2</sup> Бу воқеалардан кейин анча вақт ўтгач, ўз даврига келиб таҳтга даъвогар бўлган Аврангзеб отаси Шоҳ Жаҳон (шаҳзода Хуррам)ни ўз акаси шаҳзода Хусрав ва укаси шаҳзода Парвездарнинг қотили сифа-тида айبلاغан эди.

си қилиб тайинлаш ҳақидаги фикрга келганилиги ҳам бежиз эмас эди. Ҳинд тарихчиси доктор Трипатининг фикрича, Ҳусрав «...Жаҳонгир (шаҳзода Салим)нинг ўғли бўлишига қарамай кўп жиҳатлари билан отасидан устун турар эди. Ута мулоҳазали, одобли ва фикрлари тиниқ бўлганидан бу йигит отасининг обрўсига путур етказадиган ёхуд ичкилик ва гиёҳ-вандликка, ёки аёллар билан бўладиган машшатга ружу қўйганлардан эмас эди. У ўзи ёқимли феъл-автори, меҳр-шафқатлилиги, юмшоқ кўнгли ва соддадиллиги, холисона фикрлари ва бегараз қалби туфайли бобоси Акбаршоҳнинг ҳурмат-эътиборини қозона олган эди. У бобосининг кўпгина улуғвор фазилатларини ўзида мужассамлаштира олганлиги саройда очиқ тан олинар ва мабодо таҳтга чиқиб қолгудай бўлса, бобосининг давлатни бошқариш сиёсатини бошқа ворислардан кўра анча муваффақият ва садоқат билан амалга оширади, деб умид қилинار эди». Айтишларича, Ҳусравнинг вафотидан анча вақтлар ўтгандан кейин ҳам уни яқиндан билган кишилар Аллоҳободга келиб, у умрининг охирги кунларини ўтказган жойни зиёрат қилишар, «азоб ва қийноқларда шаҳид бўлган авлиё» сифатида унинг номини ҳурмат билан эслашар экан.

Жаҳонгиршоҳ ҳаётида Нур Жаҳон алоҳида ўрин эгаллайди<sup>1</sup>. Унинг асли исми Мехринисо бўлиб, ўзининг ноёб гўзаллиги билан ёшлигиданоқ шоҳ назарига тушган бу аёл 1611 йилга келиб катта тантана билан Жаҳонгирга турмушга чиқди ва сарой маликалари қаторидаги анча юқори тўрдан жой эгаллади.

Нур Жаҳоннинг шахси ўқувчининг дикқатини ўзига ром этмай қолмайди. У ўткир зеҳни, ақл-заковатли, яхши савод эгаси, воқеаларни олдиндан кўра оладиган аёл эди. Унинг ноёб қобилиятига тан берган Жаҳонгиршоҳ кўпинча салтанат ишларини ҳал қилишни ҳам унга топшириб қўяр эди. Чунки Нур Жаҳон салтанат ишларини ҳал этишда энг мураккаб ҳолатларда ҳам тўғри ечим топа олар ва унинг нозик дипломатия билан қабул қилган қарорларига олий мақомдаги вазирлар ҳам лол қолишар эди.

Нур Жаҳоннинг подшоҳга бўлган садоқатининг чеки йўқ эди; у эрига шу қадар меҳр билан муомала қиласр эдики, Жаҳонгир уни кўрганда ўзини йўқотиб қўяр, шунинг учун бўлса керак, кейинги пайтларда давлат ишларини бутунлай маликага ишониб топшириб қўйган эди.

<sup>1</sup> Бу ҳақда Нур Жаҳон Бегимга ажратилган саҳифада батафсил маълумот берилади.

Бу ҳақда Жаҳонгирнинг ўзи: «Мен салтанатимни севимли маликамга бир пиёла май ва бир коса таомга сотиб юборганиман», дер эди. Ёшлигида жуда эрка ўсган шаҳзода Жаҳонгирнинг шоҳлик давридаги феъл-авторида жуда кўп ижобий хислатларнинг ҳосил бўлишида севимли маликаси Нур Жаҳоннинг ҳам сезиларли ҳиссаси бор бўлса ажаб эмас.

Инглиз тарихчиси доктор В. А. Смитнинг ёзишича, Жаҳонгир «...хушфөъллик ва бадфөъллик, меҳрибонлик ва шафқатсизлик, одиллик ва адолатсизлик, нозиктабълик ва дагаллик, фаросатлилик ва болалик» кайфиятларининг мажмуасидан иборат бўлган мураккаб шахс эди. У ўткир ақл ва ноёб қобилият эгаси бўлса ҳам, сурункали ичкилик ичиш уни адои тамом қилган эди. У табиатан адолатпарвар ҳукмдор бўлса ҳам, баъзан кўпинча жаҳлига эрк берар эди. Унинг бу хислатларини ўғли шаҳзода Хусравга нисбатан қилган муносабатидан ҳам кўриш мумкин.

Жаҳонгиршоҳ динга нисбатан холисона сиёсат олиб борар, ҳеч кимнинг диний эътиқодининг камситилишига йўл кўймас эди. Кийиниш ва дастурхон атрофида ўтириш одобига кўпроқ эътибор берар, намунали хулқ ва кийиниш маданиятини тарғиб қиласр эди. У турли хил либослар ва маълум маросимларда кийиладиган сармолар турини кашф этган эди. Бундан ташқари, боғ ва гулзорлар бунёд қилишга, дарахт ва гулларни пайванд этиш ва янги навларини яратишга жуда ишқибоз эди.

Тарихнавис Жаъфарнинг таъкидлашича, Жаҳонгир ғайрат-шижоатли улуғ ҳукмдор эди. Агар у суюкли маликаси Нур Жаҳон таъсирига тушмаганда эди, улуғворликда отаси Акбаршоҳ билан бир сафда туриши мумкин эди. Бу ўринда у отаси Акбаршоҳ билан ўғли Шоҳ Жаҳон ўртасидаги оралиқ жойни эгаллаши мумкин.

Инглиз тадқиқотчisi сэр Ричард Бернснинг назарида эса Жаҳонгир Ҳиндистонда ҳукм сурган шоҳлар силсиласида сервикор феъл-авторли, жисмонан сергайрат, санъат ва турмуш лаззатларини яхши кўрадиган, бошқаларга ҳам шуни раво кўрадиган, бироқ иродаси сустлиги туфайли буюк ҳукмдор мавқеига кўтарила олмаган подшоҳ сифатида гавдаланади.

«Бобурнома»нинг туркий нусхасидан инглиз тилига ўтирган инглиз таржимони ва бобурийлар тарихи тадқиқотчisi А. С. Бейвериж хонимнинг фикрига қараганда, Жаҳонгирнинг яхши фазилатларидан бири унинг табиат гўзаллигидан лаззатлана олиши ва гулларга ошиқлигидир.

Меъморчилик соҳасида Жаҳонгир отаси каби катта ва кўзга кўринарли ишлар қилишга ултурмаган бўлса ҳам, мамлакатда тасвирий санъатнинг ривожланиши ва кенг миқёсда ёйилишига катта ҳисса қўшган. Қайнотаси (Нур Жаҳоннинг отаси) Мирзо Фиёсбек — «Эътимод-уд-давла»нинг маҳобатли ва сержило мақбарасининг қурилишига шоҳнинг ўзи бошқош бўлган эди. Бу мақбара соф мармардан бино этилган бўлиб, ўша пайтгача мамлакатда ҳали бунчалик муҳташам ёдгорлик қурилмаган эди. Турли қимматбаҳо тошлардан ишланган безакларга ва унинг меъморий услубига қарагандада бу мақбара бобурийлар ҳукмронлиги даврида яратилган меъморий обидалар ичida энг ҳашаматлиси ҳисобланади.

Жаҳонгир рассомчилик санъатига жуда ихлюсманд бўлганлигидан, ўз даврида ва ўзидан аввал яратилган санъат асарларини тўплар ва уларни авайлаб сақлар эди. У бундай асарларнинг яхши билимдони ва ҳаками ҳам эди. Ўзининг ёзишича, унга муаллифи номаълум санъат асарлари кўрсатилганда, у бу асар кимнинг мўйқаламига мансуб эканини бехато айтиб берар эди. Бордию асар бир неча муаллиф ҳамкорлигига яратилган бўлса, бу асарнинг қай бир қисми қайси рассомнинг иши эканини, яъни портретнинг юз қиёфасини ким чизгану унинг қош-кўзини ким безаганини ҳам аниқ айтиб берар эди.

Фаррухбек, Мұҳаммад Нодир, Оға Ризо, Устод Мансур, Мұҳаммад Мурод исмли санъаткорлар ўша даврнинг машҳур рассом ва ҳайкалтарошларидан бўлиб, Жаҳонгир уларни ўз ҳомийлигига олган эди. Уларнинг кўпларига санъат соҳасида эришган муваффақиятлари ва маҳорати учун юқори мансаб ва унвонлар ҳам берилган эди. Жумладан, Оға Ризога «Нодир-уз-замон», Устод Мансурга эса «Нодир-ул-асар» унвонлари берилган эди. Гўзаллик ва санъат кишисига эътиқоди юқори бўлган Жаҳонгир маҳаллий ҳиндлар орасидан чиққан рассом ва ҳайкалтарошларга ҳам ҳомийлик қилар эди. Вижон Дас, aka-ука Кешвалар, Маноҳар, Мадхав ва Тулси исмли рассомлар ҳам ўша даврнинг машҳур санъаткорлари қаторидан жой олган эдилар.

Жаҳонгир табиат гўзаллигига ошуфта бўлгани боис, ўша пайтда яратилган тасвирий санъат асарларида асосан күшлар ва гуллар, табиат манзаралари, ҳайвонлар ва муҳташам биноларнинг расмини чизишга кўпроқ эътибор берилар эди. Шариат талаблари анча қаттиқ бўлишига қарамай, баъзан инсон қиёфаси ҳам портретларда акс эттирилган эди. Бунда

рассомлар тасвиrlанаётган кишининг қадди-қоматинигина акс эттириб қолмай, унинг руҳий ҳолати ва ички кечинмаларини ҳам тўла тасвиrlашга интилар эдилар. Айрим ҳолатларда сарой маликаларининг сурати ҳам ишланар, бироқ бундай пайтларда уларнинг юзидағи ҳарир парда мусулмончилик қоидаларига кўра олинмас, бу ҳол эса уларнинг юз ифодасини ва руҳий кечинмаларини тўла акс эттириш имконини бермасди. Ишлананаётган расмларда турфа рангли бўёқлар қўлланилар, уларни дид билан танлаш ва ўз ўрнида қўллаш имкони мавжуд эди. Ўша даврда ишланган расмларга қарасангиз, расмларда бўёқлар кўпроқ қўлланилганига ишонч ҳосил қилиш мумкин. Тайёр бўлган суратлар ромга тортилиб, атрофига сержило нақшлар ишланар ва намойиш этишга чиқарилар эди. Жаҳонгирларнинг топшириғига асосан гўзал қушлар ва турфа ранг гуллар тасвири туширилган маҳсус тўплам (альбом) тайёрланиб унга ҳадя этилган эди.

Умрининг охирги йилларида у ўзининг хасталигини даъволоваш мақсадида тез-тез Кашмир водийсига сафар қилиб турар эди. Бу водийнинг ноёб гўзаллигини у шундай тасвиrlаган эди: «*Кашмир авадий ям-яшил қиёфага бурканган улкан бир боғдир. Бу воҳанинг нигоҳингиз етган жойигача тикилиб қарасангиз кўм-кўк майсазорлар, жисмирлаб оқаётган жилгалар, турфа ранг атиргуллар, бинафша ва нарғиз гуллари кўзингизни қамаштиради. Баҳорда эса ўтлоқлар ва боғларгина эмас, ҳатто уйларнинг деворлари ва дарвозаларигача турфа ранг гулларга бурканиб олади, уларга қараб кўзинг қамашади, гуллар рангининг саногига етолмайсан киши. Менинг буйругимга биноан Устод Мансур юздан ортиқ рангдаги гулларнинг расмини рисоладагидек қилиб чизди. Отам даврида Кашмирда олчалар ўсмас эди. Боғбон Мұҳаммадқули Афшар олчаларни Кобулдан келтириб ўтқазди ва маҳаллий кўчатларга пайванд қилиб ўстиришга муваффақ бўлди. Ўн-ўн беш хил мевали ва манзарали дараҳтларнинг янги навлари шу тарзда этиширилди*».

Инглиз тарихчиси П. Брауннинг фикрича, «*Жаҳонгирнинг вафоти бобурийлар салтанати тасвирий санъати учун улкан ҳомийни йўқотиш бўлди. Ундан кейинги шоҳлар даврида ҳам санъатнинг бу тури сақланиб қолди-ю, бироқ бу санъатнинг олий руҳи Жаҳонгир билан кетган эди*».

Жаҳонгир 1627 йилнинг октябрь ойида Кобулдан Кашмирга дам олиш учун кетаётганда вафот этди. Унинг жасади Лоҳур яқинидаги Шоҳдара деган жойга дағн этилиб, қабри устига муҳташам мақбара бунёд этилди.

## ШОҲ ЖАҲОН

### Шоҳ Жаҳон ҳаётидаги муҳим саналар

- 1628 й.** — Шоҳ Жаҳон (Шаҳзода Хуррам) тож кийиб тахтни эгаллади.
- 1631 й.**
- 17 июн** — Малика Мумтоз Маҳал вафот этди.
- 1634 й.** — Товус тахт қуриб битказилди.
- 1636 й.** — Шаҳзода Аврангзеб Деккон ўлкасига ҳоким этиб тайинланди.
- 1645 й.** — Тож Маҳал мақбараси қуриб битказилди.
- 1656 й.** — Мир Жумла машхур Кўҳи Нур олмосини шоҳга инъом этди.
- 1657 й.** — Аврангзебнинг тахт учун кураши бошланди ва ғала-ба билан якунланди.
- 1658 й.** — Шоҳ Жаҳон Агра қалъасида ҳибсга олинди ва Авранг-зеб тахтни эгаллади.
- 1666 й.** — Шоҳ Жаҳон вафот этди.

Жаҳонгирнинг Хусрав, Парвез, Хуррам ва Шаҳриёр исмли тўрт ўғли бўлиб, уларнинг учинчиси, яъни шаҳзода Хуррам отасидан сўнг тахтни эгаллагач, ўзини Шоҳ Жаҳон деб эълон қилган эди. Шаҳзода Хуррам 1592 йилда Лохурда Жаҳонгиршоҳнинг ҳинд хотинидан туғилган фарзанди эди. У ёшлигида қадди-қомати жуда келишган, ақлу одобда бошқаларга намуна бўладиган, шу билан бирга шоншуҳратга интигувчан сергайрат йигит бўлганидан, бобоси Акбаршоҳнинг суюкли набираси ҳисобланарди. Унинг шиҷоати, ақл-заковатини кўрган-билганлар ўша пайтдаёқ унинг тахт вориси бўлишига комил ишонч билан қарап эдилар. Укаси шаҳзода Шаҳриёр ҳали кўзга ташланиб улгурмасидан аввал шаҳзода Хуррам подшоҳ отасининг ҳам эътиборини қозониб улгурган эди. Унинг жасурлиги ва масъулиятни ҳис эта билиш туйғусини яхши қадрлаган Жаҳонгиршоҳ Хуррамни ўспиринлигидаёқ кўпгина жиддий ҳарбий юришларга сардор этиб тайинлар эди. У 15 ёшга тўлганида 8 минг пиёда аскар ва 5 минг суворийга қўмондонлик қилиш ҳуқуқини берувчи ҳарбий мансабга муносиб кўрилган. 1611 йилда 19 ёшга тўлгач, у 10 минг пиёда аскар ва 5 минг отлиқ навкарга қўмондонлик қила бошлади. 1612 йилда шаҳзода Хуррам лашкарбоши Асафхоннинг қизи гўзал Мумтоз Маҳал (Аржуманд Бону Бегим)га уйланди ва шун-

дан сўнг 30 минг пиёда ва 20 минг отлиқ аскардан тузилган қўшинга лашкарбоши этиб тайинланди.

Шаҳзода Шаҳриёр Жаҳонгиршоҳнинг суюкли маликаси бўлмиш Нур Жаҳоннинг аввалги эри Алиқулбекдан бўлган эркатой қизи Лодли Бегимга уйлангандан сўнг, шаҳзода Хуррамнинг атрофида турли фитналар уюштирилиб, унинг тахтга интилиш йўлида ҳар хил ғовлар пайдо бўла бошлади. Чунки салтанатда подшоҳдан ҳам устун келишга интиладиган малика Нур Жаҳон ўз акаси, бош лашкарбоши Асафхон билан ҳам ҳисоблашмас, фақат ўзининг куёви бўлмиш Шаҳриёрни тахтга чиқариш режаларини тузар эди. Бундай ҳаракатларга норозилик белгиси сифатида шаҳзода Хуррам 1622 йилда исён кўтарди ва бу ҳол ота-бала ўртасида кескин тўқнашувларга сабаб бўлди. Асафхоннинг саъи-ҳаракати билан ота-бала ўртасида муроса битимига келишилди-ю, бироқ Нур Жаҳонни ўз фикридан қайтаришнинг иложи бўлмади.

1627 йилнинг октябрига келиб Жаҳонгиршоҳ Лоҳурда бу фоний дунёдан кўз юмганда Нур Жаҳон унинг ёнида эди. Нозик вазиятдан усталик билан фойдаланиб, тахтни эгаллаб олиш учун у зудлик билан шаҳзода Шаҳриёрни пойтахтдан Лоҳурга чақиртирди. Чунки бу пайтда тахтнинг асосий даъвогари бўлмиш шаҳзода Хуррам Ҳиндистоннинг жанубидаги узоқ ўлкалардан бўлган Деккон вилоятида эди. Унинг бу ерга этиб келиши учун бир неча ой муддат керак эди. Вазиятнинг қалтислигини яхши англаган лашкарбоши Асафхон ҳам бу ҳолга лоқайд қараб турмади. Куёви шаҳзода Хуррамнинг яқин орада пойтахтга этиб кела олмаслигига ва тахтни эгаллашдек нозик имконият қўлдан бой берилишига ақли етган Асафхон ўз тажрибаси ва ҳарбий қудратини ишга солиб, кескин ҳаракатлар билан марҳум шаҳзода Хусравнинг ўғли Довар Бах уни вақтинча тахтга чиқариб қўйди. Чунки сарой қоидаларига биноан подшоҳдан кейин тахтга энг катта ўғил, яъни шаҳзода Хуррам даъвогар бўлиши, у ҳаётдан кўз юмган бўлса, унинг ўғли даъвогар бўлиши мумкин эди. Бу ҳолдан усталик билан фойдаланган Асафхон шаҳзода Шаҳриёрхоннинг тахт сари интилиш йўлини тўсган эди. Малика Нур Жаҳон билан шаҳзода Шаҳриёр Асафхоннинг шиддатига дош бера олмадилар.

1628 йилнинг февраль ойида шаҳзода Хуррам Деккондан пойтахтга этиб келиб ва кескин ҳаракатлар билан тахтни эгаллагач, ўзини Ҳиндистондаги бобурийлар салтанатининг

подшоҳи Шоҳ Жаҳон деб эълон қилди. Шундан сўнг шаҳзода Шаҳриёр ҳибсга олиниди, Нур Жаҳон эса салтанат ишларидан умуман четлатилди ва умрининг қолган қисмини тоат-ибодат билан ўтказиб, 1645 йилда ўз ажали билан оламдан ўтди. Тахтдан туширилган Довар Бахш боши омон қолганидан мамнун ҳолда Эронга қараб йўл олди, чунки тахтга даъвогар бўлиши мумкин бўлган барча шаҳзодалар бирмабир ҳибсга олиниб, қатл этилаётган эди.

Шоҳ Жаҳоннинг ўттиз йил (1628—1658) давом этган хукмронлик даври Ҳиндистон тарихида ёрқин из қолдирди. Бу давр ичида бобурийлар империяси ҳудудан унчалик катта ҳажмда кенгаймаган бўлса ҳам, ўша давр меъёри билан ўлчанадиган бўлса, мамлакат тараққиётининг энг юқори чўққисига чиққан эди. Бу давр фуқаро учун тинч, осуда ҳаёт ва тўкин-сочинлик, мўл-кўлчилик йиллари бўлди. Албатта, бу давр ҳам мамлакат ичкарисида айрим исёнлар ва Шоҳ Жаҳоннинг соғлиғи ёмонлашгандан кейин шаҳзодаларнинг тахт учун қурашлари ҳамда салтанат ҳудудини кенгайтириш учун айрим ҳарбий юришлар бўлиб турди. Лекин бу юришлар фуқаро гарданига унчалик оғир юқ бўлиб тушибади. Савдо-сотиқ ва маҳсулот ишлаб чиқариш анча юқори босқичга кўтарилди, аҳолидан олинадиган солиқлар камайтирилди, маънавий ҳаёт соҳасида ҳам сезиларли ишлар амалга оширилди.

Тарихнависларнинг таъкидлашларича, Шоҳ Жаҳондан аввалги ҳукмдорлар даврида мамлакат ҳазинасидан сарфланган харажат Шоҳ Жаҳон даврида сарфланган харажатнинг тўртдан бирига ҳам тенг эмас, лекин бошқа подшоҳлар йиллаб тўплаши мумкин бўлган бойликни Шоҳ Жаҳон жуда қисқа муддат ичидаёқ тўплаб қўйган эди.

Бойликни тўплаш ва уни ўз ўрнида сарфлай билиш учун ҳам алоҳида қобилият ва укув бўлиши лозимлигини, давлат маъмуриятини ва унинг қўшинини бошқариш тизимини қай йўсинда ташкил этиш, солиқлар тизимини такомилластириш, қўшни мамлакатлар билан қай тарзда иқтисодий ва маданий алоқалар ўрнатиш ва бу ишлардан ўз мамлакати манфаати йўлида қандай фойдаланиш лозимлигини Шоҳ Жаҳон яхши англар ва шу нуқтаи назарларни эътиборда тутган ҳолда чора-тадбирлар белгилар ва уларнинг изчил амалга оширилиши устидан қатъий назорат ўрнатган эди.

Бу тадбирларнинг натижаси ўлароқ, у хукмронлик қилган даврда мамлакат ҳам иқтисодий, ҳам ижтимоий ва айниқса, маданий жиҳатдан тараққиётнинг энг юқори чўққи-

сига чиқди. Шунинг учун бўлса керак, тарихчилар унинг ҳукмронлик даври Ҳиндистондаги «*бобурий подшоҳлар ҳукмронлигининг олтин даври*» деб, Шоҳ Жаҳоннинг ўзини эса «*бунёдкор подшоҳ*» деб аташади. Чунки унинг ҳукмронлиги даврида бунёд этилган иншоотлар ундан аввалги аждодлари даврида қурилган бинолардан меъморий услуби жиҳатидан фарқ қиласи. Мамлакат ҳудудида барпо этилган биноларнинг кўпчилиги, шу жумладан, Ҳумоюншоҳ мақбараси, Фотеҳпур Секри шаҳрида қад кўтариб турган бинолар, Искандариядаги Акбаршоҳ мақбараси, Аградаги Эътиимод-уд-давла Мирзо Фиёсбек мақбараси каби иншоотлар ўз меъморий услугига кўра ҳинд-форсча услубда қурилган. Бу бинолар ўзининг улкан ҳажми ва баҳайбатлиги билан ажралиб турса, Шоҳ Жаҳон даврида бунёд этилган меъморий обидалар ўзининг сержилолиги ва пурвиқорлиги билан кишини мафтун этади. Улар ортиқча маҳобати ва сербезаклилиги билан эмас, аввало нозик дид ила жило берилгани боис киши дикқатини ўзига тортади.

Акбаршоҳ ва Жаҳонгиршоҳ даврида қурилган иншоотлар ҳинд-мусулмон услубида асосан қизил ғиштдан қурилган бўлса, Шоҳ Жаҳон даврида барпо этилган бинолар мусулмон меъморлари лойиҳаси асосида қурилган бўлиб, уларнинг безаги учун асосан мармар ишлатилар эди. Шоҳнинг мусулмончиликка эътиқоди кучли бўлганидан бўлса керак, 1632 йилдан эътиборан ҳиндларнинг бутхоналарини қуриш ман этиб қўйилган эди.

Шоҳ Жаҳон ҳукмронлиги даврида бунёд этилган меъморий обидаларнинг энг ноёб намунаси — дунёning етти мўъжизасидан бири ҳисобланган Тож Маҳал мақбарасидир. Бу бино шоҳнинг севимли маликаси ва вафодор хотини Мумтоз Маҳал Бегим вафотидан сўнг унинг хотирасига бағишлиб Жамна дарёси бўйига қурилган ёдгорлик бўлиб, бу обида соф муҳаббат ва садоқат рамзи сифатида бутун жаҳон аҳлини ҳозиргача ҳайратга солиб келади. Muаррих Ҳамид Лоҳурийнинг гувоҳлик беришича, бу бино 12 йил давомида қурилган бўлиб, унинг қурилишига 50 лак<sup>1</sup> рупий маблағ сарфланган.

Шоҳ Жаҳон Аgra қалъасида ҳам бир неча тарихий иншоотлар қурдирган. Улар орасида Моти Масжиди ва Музаммон Бурж деб аталган қаср ўзининг бетакрор гўзаллиги билан

<sup>1</sup> 1 лак 100 мингга тенг.

кишини лол қолдиради. Масжид Девони Омнинг шимолий қисмида жойлашган бўлиб, у 4 йил (1648—1652) давомида қуриб битказилган. Манбаларнинг гувоҳлик беришича, бу бинонинг қурилишига давлат хазинасидан 30 лак рупий сарфланган. Музаммон Бурж қасри соф мармардан ишланган муҳташам сарой бўлиб, Шоҳ Жаҳон умрининг ҳибсда ўтган охирги йилларида шу қасрда яшаган ва шу ерда вафот этган эди.

1639 йилнинг май ойида Шоҳ Жаҳон пойтахт яқинидаги кейинчалик Шоҳжаҳонобод деб аталган меъморий мажмуадан ташкил топган улкан қалъанинг пойдеворига тош кўйиб берган эди. У ерда қад кўтарган Али масжиди ва қалъанинг ўзи ҳозиргача ўз чиройини бутун дунёга кўз-кўз қилиб туради. Бу меъморий мажмуанинг очилиш маросими жуда катта тантана ва тўю томошага айлантирилган эди. Ўша пайтда бунёд этилган Жомеъ Масжиди Ҳиндистондаги масжидлар ичida энг каттаси ва ҳашаматлиси ҳисобланади, унда бир вақтнинг ўзида 5000 киши намоз ўқиши мумкин. Бу бино олти йилда қуриб битказилган бўлиб, унинг қурилишига хазинадан 10 лак рупий маблағ сарфланган. Ўша пайтда бунёд этилган меъморий обидалар орасида Низомиддин Авалиёнинг оқ мармардан ишланган улкан мақбараси ҳамда Ажмор шаҳрида қад кўтариб турган муҳташам бинолар кишининг диққатини ўзига тортмай иложи йўқ.

## АВРАНГЗЕБ ОЛАМГИР

### Аврангзеб ҳаётидаги муҳим саналар

**1618 й.**

**24 октябр**— Аврангзеб таваллуд топди.

**1658 й.** — Аврангзеб тахтни эгаллади.

**1659 й.** — Шаҳзода Шоҳ Шужо қўшини тор-мор этилиб, Шоҳ Жаҳон ва шаҳзода Мурод ҳибсга олинди. Аврангзебнинг тож кийиш маросими бўлиб ўтди.

**1661 й.** — Шаҳзода Муродни қатл этиш ҳақида ҳукм чиқарилди.

**1662 й.** — Аврангзеб қаттиқ бетоб бўлиб қолди.

**1666 й.** — Шоҳ Жаҳон 75 ёшида Аграда вафот этди.

**1681 й.** — Аврангзеб Деккон ўлкасига жўнаб кетди.

**1707 й.** — Аврангзеб оламдан ўтди. Шаҳзода Муazzам ёхуд Баҳодиршоҳ тахтга чиқди.

Ҳиндистонда салкам уч ярим аср ҳукм сурган бобурийлар салтанати тарихининг ярим асрлик даври бобурий шаҳзода Аврангзеб Оламгир ҳукмдорлик қилган йилларга

тўғри келади. Бобурийлар сулоласида Аврангзеб бешинчи авлодга мансуб бўлиб, улар орасида бобокалони Акбаршоҳ сингари Ҳиндистон қитъасидаги бу улкан империяни ягона марказдан бошқариладиган яхлит бир давлат сифатида 50 йил (1658—1707 йй.) мобайнида бошқариб келган тарихий шахсдир.

Шаҳзода Аврангзеб («Тахт безаги») подшоҳ Шоҳ Жаҳоннинг битта онадан туғилган тўрт ўғлининг учинчиси бўлиб, у 1618 йилнинг 24 октябрида Ҳиндистоннинг Ужжайин вилоятидаги Доҳад шаҳрида дунёга келди. Болалиги даноқ у араб, форс, туркий ва ҳинд тилларини яхши ўрганиди, араб алифбосининг «шикаста» ва «настаълик» усулларида моҳир хаттотлар каби ёза олар эди. Эътиқодига кўра у ўзини сунний мазҳабига мансуб мусулмон деб ҳисоблар ва ёшлигиданоқ муқаддас Қуръони Карим оятларини мукаммал билар ва уларни таҳдил қила олар эди. 1625 йилда Шаҳзода Хуррам (Шоҳ Жаҳон) ўз отаси Жаҳонгиршоҳга қарши исён кўтариб мағлубиятга учраганида, унинг ўғилларидан Доро Шукуҳ ва Аврангзеблар малика Нур Жаҳон ҳузурида гаровга ушлаб турилган ва Жаҳонгир вафотидан кейингина озод қилинган эдилар. Аврангзеб ўз олдига аниқ мақсад қўйиб, унга эришиш йўлида тинимсиз меҳнат қиласидаган қатъий иродали йигит бўлганидан, ҳаётнинг оғир дамларида ҳам ўзини йўқотмас ва мураккаб вазиятдан чиқиш йўлларини совуққонлик билан топа оладиган жасур ва файратли инсон эди. Болалик пайтида кунлардан бир кун у филлар жангини томоша қилаётган пайтда бир фил шиддат билан унга қараб юриб қолганда ёш Аврангзеб филдан нари қочиш ўрнига, филга қарши ҳужум қилиб, уни орқага қайтишга мажбур қилган эди. У қурол ишлатиш ва жанг олиб бориш санъатини маҳорат билан эгаллади ва биринчи ҳарбий юришдаёқ рақибини мағлуб этиб муваффақият билан қайтди. Марказий Осиё ва Кандаҳорга қилинган ҳарбий юришларда лашкарбошилик қилди, таҳтни эгаллагунга қадар Гужарат вилоятида ва Деккон ўлкасининг тўртта вилоятида ҳокимлик вазифасида туриб, ҳарбий саркарда ва моҳир маъмур сифатида яхшигина тажриба ортириди. Бу борада тўпланган тажрибалари ва қобилияти ака-укаларига қарши таҳт учун олиб борилган шиддатли жангларда қўл келиб, улардан ҳар томонлама устун эканини намойиш этди ва 1658 йилнинг июн ойида салтанат таҳтини қўлга киритди. 1659 йилнинг июн ойида тож кийиб, ўзини расман Ҳиндистондаги бобурийлар салтанатининг подшоси Абдул Музаффар Муҳиддин Му-

ҳаммад Аврангзеб Баҳодир Оламгир — Подшоҳи Фозий деб ўълон қилди.

Ўшанда Эрон шоҳи ва Бухоро хонларидан маҳсус элчилар келиб, совға-саломлар билан подшоҳни кутлаб муборакбод этган эдилар. Подшоҳ сифатида Аврангзеб ўз вазифасига жуда юқори масъулият билан қарап, ҳалқ манфаатини ўз манфаатидан юқори қўяр, оддий фуқарони ҳимоясига олишни ўзининг асосий бурчи деб билар ва қўл остидаги мансабдорлардан ҳам шу тамойилларга риоя қилишларини қатъий талаб қиласар эди. Отасига ёзган хатларининг бирида у шундай деб ёзган эди: «*Сиз мӯътабар зоти олийларига яхши маълумки, қудрати улуғ Парвардигор ўзининг ишончини мамлакатни асраб-авайлай оладиган ва ҳалқини ҳимоя қила оладиган бандасигагина раво кўради. Ҳукмдорлик дегани эса ўз манфаати ва ҳузур-ҳаловатини кўзлаш эмас, балки оддий фуқарони ўз ҳимоясига олиш демакдир*».

Аврангзеб табиатидан жуда ҳафсалали киши бўлиб, бирон-бир маъмурий иш ёхуд ҳарбий тадбир унинг назаридан четда қолмас эди. Одати бўйича у бир кеча-кундузда учтўрт соатгина ухлар, қолган вақтда турли миқёсдаги маъмурий, ҳарбий ва майший масалалар билан машғул бўлар эди. Сарой амалдорларидан бири унга соғлигини авайлаш мақсадида бир оз дам олишни маслаҳат берганида у шундай жавоб берган экан: «*Ҳақ Таоло мени бу дунёга шаҳзода ва подшоҳ қилиб ўзим учун эмас, балки бошқа бандалар учун яшаш ва уларга хизмат қилиш учун яратган. Ўзимнинг ҳаловатими ни эмас, балки бошқаларнинг ҳузурини кўзлаб иш тутмоқлик менинг бурчимдир. Менинг баҳтим ҳалқимнинг баҳтидан ажралмасдир*».

Аврангзеб ўз ҳаётининг асосий мазмунини ўз ҳалқи устидан беғараз, холисона ва адолатли ҳукм юргизиш деб биларди. У салтанат таҳтини эгаллаган пайтда мамлакатдаги иқтисодий, ижтимоий ва сиёсий вазият жуда аянчли аҳволда эди. Отаси Шоҳ Жаҳон бетоб бўлиб ётиб қолгандан кейин унинг ёнида турган шаҳзода Доро Шукуҳ ўзининг ношудлиги ва лаёқатсизлиги туфайли унга ишониб топширилган салтанат ишларини ўз ҳолига ташлаб қўйган ва мамлакатни рисоладагидек бошқаришга қурби етмас эди. Чунки ака-ука шаҳзодаларнинг таҳт учун олиб борган шиддатли жанглари ҳам мамлакатнинг иқтисодий ва сиёсий аҳволини жуда танг қилиб қўйганди. Мавжуд вазиятни Аврангзеб каби серғайрат ва ақл-фаросатли, уддабурон раҳбаргина одилона ҳал этиши мумкин эди.

Шунинг учун Аврангзеб тож кийиб тахтга чиқиши биланоқ мамлакатнинг маъмурый идораларида, унинг молиявий тизимида кескин ислоҳий тадбирлар ўтказиш ҳақида қатор фармонлар чиқарди. Бу фармонлар асосида дәҳқонлар, ҳунармандлар ва савдогарларнинг турмушини яхшилашга қаратилган тадбирлар белгиланди.

Бу пайтга келиб савдогарлардан олинадиган солиқлар ва бож тўловлари жуда юқори бўлганидан, мамлакат ичкарисида бўладиган савдо ва ташқаридан келадиган моллар миқдори кескин камайган, бу ҳол эса мамлакат ичкарисида нарх-навонинг кўтарилиб кетишига сабаб бўлаётган эди. Шу сабабли ҳам карвон йўлларида ва кечувлардан ўтишда, давлат чегараларини кесиб ўтишда олинадиган «роҳдари» деб аталадиган солиқ тури бекор қилинди, шунингдек ерли фуқародан уй (ер) солиғи сифатида олинадиган «пандори» солиғи ҳам бекор қилинди. Умуман, аҳолидан турли баҳоналар билан олинадиган «аҳбоби» деб аталадиган турли йиғим ва тўловларнинг 80 га яқин тури бекор қилинди. Бу солиқларнинг асосий қисми оддий меҳнаткаш халқ зиммасига тушар эди. Бу билан давлат хазинаси бир неча юз минг рупий маблағдан маҳрум бўлаётган бўлса ҳам, оддий фуқаро гарданидаги бу оғир юқ олиб ташланди. Бу тадбирий чоралар мамлакат подшоҳининг ўз халқининг моддий аҳволини яхшилаш ниятида эканидан далолат бериб турибди.

Аврангзеб ёшлигиданоқ ўта художўй ва тақводор инсон бўлгани учун тахтни эгаллагач, ўз фуқаросиёнинг ижтиёмий аҳволини ҳам яхшилаш, яъни уларнинг маънавий поклиги учун ҳам қаттиқ кураш олиб борди. Унинг шариат талабларига итоаткорлиги шу қадар юқори даражада эдикӣ, ҳинд тарихчиси Л. П. Шарманинг таъкидлаб айтишича, Марказий Осиё ўлкаларига қилинган ҳарбий юришларнинг биррида жанг кескин давом этаётган бир пайтда отдан тушиб, пешин намозини ўқиб бўлгач, яна жангга кириб кетган экан. Шахсий ҳаётда ҳам Аврангзеб жуда камтар ва рисоладаги мусулмон бўлган эди. Истеъмол қиласидиган таомлари ҳам, киядиган лиbosлари ҳам жуда содда бўлиб, ортиқча ҳашам ва зебу зийнатларни ёқтирумас эди. У умрида бирон марта ҳам кайф қиласидиган ичимлик ёхуд гиёҳларни тотиб кўрмаган тақводор инсон эди. Шунинг учун бўлса керак, унинг хотинлари бир вақтнинг ўзида тўрттадан ортмаган эди.

Аврангзеб ўзини мамлакатни одилона идора қилиш учунгина эмас, балки ислом динини, ва айниқса, унинг сунний

мазҳаби ақидаларини ҳимоя қилиш ва унинг таъсир доира-сини янада кенгайтириш учун ҳам тахтга чиққан деб ҳисоблар эди.

Ўзининг 50 йиллик ҳукмдорлик фаолиятида Аврангзеб ҳамиша ана шу ақидага содик қолди ва бу эътиқодидан бир дақиқа ҳам воз кечмади. Ана шу ақидага содик бўлиш мақсадида у ўз отасини ҳибсда сақлашдан ҳам, ўз манфаатини кўзлаб тахтга даъвогарлик қилган ака-укаларини қатл қилишдан ҳам, ўз ўғилларини зинданбанд ва дарбадар қилишдан ҳам қайтмади. Чунки у мусулмон подшоҳнинг асосий вазифаси мана шулардан иборат деб билар ва ўзидан олдин ўтган подшоҳ аждодлари фаолиятидаги асосий камчиликлари ҳам ана шундай ишларни қилмаганликларида деб билар эди. Шу мақсадда мамлакатда зарб қилинадиган танга пулларга Куръони каримдан олинган калималарни ўйиб ёзиш қатъиян ман этилди, раққослар ва созандалар саройдан қувиб чиқарилди, мамлакат ҳудудида майпарастлик ва гиёҳвандлик қилиш ҳамда қимор ўйнаш қатъиян тақиқланди, бузуқ аёлларга эрга тегиш ёхуд мамлакат ҳудудидан чиқиб кетиш талаби қўйилди, файдидинларнинг диний байрамларини саройда нишонлашга чек қўйилди. Масжид, мадрасалар ва хонақоларни қайта таъмирлаш, янгиларини қуриш, масжидларнинг имом ҳамда муazzинларига мунтазам равишда маош тўлаш тартиби ўрнатилди.

Шуни ҳам айтиш керакки, Аврангзеб файдидинларга нисбатан муросасиз ва бетоқат эди. Уларнинг бутхоналарини ва мактабларини таъмирлаш ва янгисини қуриш ман этилди, кўпгина бутхоналар ўрнига масжидлар курилди. 1679 йилнинг апрел ойидан эътиборан мусулмон бўлмаган ҳиндлардан «жузъя» солиғини ундириш ва уларнинг муқаддас қадамжоларини зиёрат қилганликлари учун ҳам қўшимча солиқ тўлашлари тартиби қайта тикланди. Мусулмон савдо-гарлари мол учун тўланадиган солиқдан озод қилиниб, файдидин савдогарлардан молининг 5 фоизи миқдорида солиқ олиш тартиби жорий қилинди. Солиқ йигадиган идораларда номусулмонларнинг ишлаши ман этилди. 1688 йилдан эътиборан юқори лавозимдаги файдидинларнинг тахтиравон (маҳоба)да юришлари ва чиройли отларни миниб юришлари ҳам чеклаб қўйилди. Бундай тадбирлардан кутилган асосий мақсад мамлакат миқёсида кўпчиликни ташкил қилувчи маҳаллий ҳиндларни мусулмон динини қабул қилишга ундаш эди. Уларни ислом динига жалб этиш учун уларга турли лавозимлар, пул, ер ва бошқа имтиёзлар берилар эди. Инг-

лиз тарихчиси С. Лейн — Поулнинг фикрича, Аврангзеб ўз таҳтини фақат дин учунгина ушлаб турган эди. Бироқ бошқа динларга нисбатан олиб борилган бундай тажовузкорона сиёсат натижасида, табиийки, кўпчиликни ташкил қилувчи номусулмон аҳолиси подшоҳнинг итоаткор фуқаросига эмас, балки фазабнок рақибиға айланиб қолган эди.

Диний жаҳолатпарастлик деган тушунчага жуда яқин келиб қолган бу дунёқараш улкан мамлакатни бошқаришда муваффақиятга олиб келавермаслиги шубҳасиз. Аврангзеб хукмронлигининг охирги йилларида мамлакатда рўй берган сиёсий инқизоз, ундаги бошбошдоқлик, жипсликнинг сусайиши ва ҳатто подшоҳга қарши кўтарилиган исёнлар, қолаверса, фарзандларнинг ўз оталари сиёсатидан, унинг қаттиққўллигидан, ўз ўғилларига нисбатан ишончсизлигидан норозиликлари, эҳтимол, ана шундай жаҳолатпарастлик билан олиб борилган сиёсат натижаси бўлгандир. Аврангзеб тарихини яхши ўрганган тарихнавислардан бири сэр Жоду Нат Саркорнинг фикрича, унинг хукмдорлик даври ҳар бири 25 йилга тенг бўлган икки даврга бўлинади. Шимолий Ҳиндистонда ўтган биринчи қисми мамлакат ҳудудини кенгайтириш, салтанат қудратини иқтисодий ва сиёсий жиҳатдан мустаҳкамлашга бағишлиланган бўлса, иккинчи ярми мамлакат жанубидаги Деккон ўлкаси вилоятларида ва айниқса, Бижопур, Аҳмаднагар, Карнат, Маҳораштра, Голконда каби вилоятларда ражпутлар, маратҳалар ва сикхларни бўйсундириш учун олиб борилган шафқатсиз жанглар мамлакатни ҳам иқтисодий, ҳам сиёсий жиҳатдан инқизозга олиб келган давр бўлган эди.

Бу ҳарбий ҳаракатлар мамлакат ҳудудини анча кенгайтириш имконини берган бўлса ҳам, бўйсундирилган бу ўлкаларни узоқ вақт қўлда сақлаб туриш имкони бўлмади. Бунинг сабаби улкан мамлакатни ягона марказдан туриб бошқариш имконияти бўлмай қолгани, подшоҳнинг кексалиги билан боғлиқ эди. Ўтказилган қаттиқ диний тазииклар натижаси ўлароқ кўплаб жанубий вилоятларнинг аҳолиси подшоҳдан юз ўгира бошлаган эди. Бу пайтда Аврангзеб жуда кексайиб қолган (90 ёшда)лиги учун ҳам мамлакатни бошқариш тизгинини ўз қўлида маҳкам тутиб тура олмас эди. Мамлакатнинг номусулмон аҳолисигина эмас, балки мусулмон аҳолисининг шиа мазҳабига мансуб қисми ҳам қаттиқ тазиик остига олиниши салтанат яхлитлигига ва диний мазҳаблари ўртасига раҳна солинишига сабаб бўлди.

Бу ҳол эса турли исёнлар қўтарилишига олиб келди, пировардида мамлакатнинг иқтисодий ва ҳарбий қудратига птур етказди, давлатни идора қилиш ишлари издан чиқди, фуқаронинг мол-мулки, унинг хавфсизлиги ва тинч, осуда ҳаёти таҳлика остида қолди.

Бунинг устига, Аврангзеб ҳаётининг охирги йилларида унинг оиласи ҳам инқирозга юз тута бошлади. 1702 йилда қизи Зебунисо Бегим вафот этди, 1704 йилда исёнкор ўғли Муҳаммад Акбар Эронда қувғинда, дарбадарликда ҳаётдан кўз юмди. 1705 йилда суюкли келини Жаҳонзеб оламдан ўтди, 1706 йилда кичик синглиси Гавҳараро Бегим бандаликни бажо келтирди. Худди шу йили иккинчи қизи Мөҳринисо Бегим ва унинг эри Иззат Бахш (Аврангзебнинг укаси шаҳзода Мурод Бахшнинг ўғли) дорулғанодан дорулбақога риҳлат қилдилар. Бир ой ўтмай невараси (исёнкор шаҳзода Муҳаммад Акбарнинг ўғли) Баланд Акбар вафот этди. Ана шундай мусибатли кунларда 1707 йилнинг 3 марта куни 90 ёшида Аврангзеб Оламгир бу ёруғ дунё билан видалашди. Унинг жасади Давлатобод шаҳридан 6—7 километрлик масофадаги авлиё Шайх Зайн-ул-Ҳақ қабри ёнига дағн этилди. Ҳинд тарихчиси Жодунат Саркорнинг таъбири билан айтганда, «Буюк бобурийлардан яна бир буюги»нинг ҳаёти ана шундай хотима билан якунланди.

## БОБУРИЙЛАР САРОЙИДАГИ МАЛИКАЛАР

Маълумки, шарқ мамлакатлари тарихида, шу жумладан, соҳибқирон Амир Темур ва темурий шаҳзодалар ҳукмронлик қилган даврларда сарой аёллари анчагина салмоқли мавқени эгаллаб турғанлар ва давлатни бошқаришда маликаларнинг фикр-мулоҳазалари ҳамда эътиқодлари албатта ҳисобга олинган. Бунга буюк Соҳибқироннинг севимли маликаси, ўз даврининг юксак идрокли, фаҳм-фаросат ва гўзалликда тенги йўқ, ноёб ақл-заковат эгаси бўлмиш Сарой Мулк Хонимга бўлган муносабатини, Шоҳруҳ Мирзонинг суюкли хотини, нозик дидли, оқила, тадбиркор ва сухандон малика Гавҳаршод Бегимга бўлган муносабатини ёхуд Халил Султон Мирзонинг саройида унинг суюкли маликаси Шодимулк Бегим тутган мавқенини мисол қилиб кўрсатиш мумкин.

Темурийлар салтанатининг Ҳиндистондаги давомчилари бўлмиш бобурий подшоҳлар салтанатида ҳам маликалар давлатни одилона идора қилишда, мамлакатни ободонлашти-

риш ишларида, жумладан, мөймөрчилик, санъат ва адабиётни ривожлантиришда муҳим мавқени эгаллаганлар ва тарихда сезиларли из қолдирганлар.

Ҳиндистон тарихидан хабар берувчи тарихий, илмий ва адабий манбалар саҳифаларини варакълар эканмиз, уларнинг зарваракъларида бобурий шоҳлар ва шаҳзодалар қаторида ўзига хос нурли ёғду таратиб турган сарой маликалари сиймоси алоҳида ўрин эгаллаганига гувоҳ бўламиз. Улар кўз олдимизда шоҳ ва шаҳзодаларга давлатни идора қилишда оқила маслаҳатгўй, тадбиркор сиёсатдон, истеъодли олималар, ҳассос шоиралар, садоқатли ва вафодор ёр ҳамда меҳрибон оналар сифатида гавдаланадилар. Уларнинг ҳаёт йўли ва фаолияти адиллар ва тарихнавислар дикқатини ҳамиша ўзига жалб қилиб келмоқда.

Маълумки, шарқ мамлакатлари тарихида, жумладан, Гулбадан Бегимнинг «Хумоюннома» асарида айтилишича, Хумоюншоҳ саройида шодлик кунларида аёллар мардонавр кийимлар кийиб, чавандозлик ва тирандозлик каби ўйинларда иштирок этишган ва камонбозлик машқларида қатнашганлар. Тўй маросимларида әса Бегимлар подшоҳнинг ўнг томонида зардўзи кўрпачаларда ўтиришган.

Гулбадан Бегим уларнинг ҳаммаларини (жами 96 киши) санаб, «... булар мардона кийимларни киярдилар ва заҳиргартарошлиқ, чавандозлик, тирандозлик каби ҳунарларга уста эдилар ва созлардан кўпчилигини чалар эдилар», деб ёзади. Аёлларнинг тақдирини ҳал этишда уларнинг эрки ва фикри албатта ҳисобга олинар эди. Уларнинг ўз эркига эга бўлганликларига Хумоюншоҳнинг Ҳамидабонуга уйланиши воқеаси яхши мисол бўлиши мумкин.

Гулбадан Бегимнинг гувоҳлик беришича, Ҳамидабону Бегим Ҳиндол Мирзонинг пири бўлмиш Мирбобо Дўстнинг қизи бўлиб, Ҳиндол Мирзо уни ўз синглиси ва фарзанди қаторида кўрар эди. Шунинг учун ҳам подшоҳ акасининг бу қизга харидор бўлганидан хабар топгач, мабодо турмуши яхши бўлмаса, кулфатга сабаб бўлади, деган андишага бориб, бу никоҳга унчалик рўйхушлик бермаган эди. Хумоюн Ҳамидабонуни бир кўргандан кейиноқ унга уйланишга қарор қилган эди. Уни иккинчи бор ҳузурига чорлаганда, «Подшоҳларни фақат бир марта кўриши мумкин, иккинчи маротаба кўриш номаҳрамлик бўлади, мен бормайман», — дея рад жавобини беради бўлажак малика. Унинг бу сўзларини совчи бўлиб борган Субҳонкули Ҳазрат Ҳумоюнга етказганда, у «Агар номаҳрам бўлсалар, маҳрам қилиб

**оламиз», — дея яна ҳузурига чақириради.** Бироқ қирқ кунгача бўлажак малика подшоҳ ҳузурига боришга розилик бермайди. Шундан сўнг Гулбадан Бегим билан Ҳиндол Мирzonинг туққан онаси бўлмиш Дилдор Оғача Бегим Ҳамидабонуга насиҳат қилиб, «*Ахир, бир кишига тегасан-ку, подшоҳдан ҳам яхши киши бўладими?*» — дедилар. Бунга жавобан Ҳамидабону: «*Тўғри, лекин мен қўлимни узатсан бўйнига етадиган кишига тегаман, қўлимни узатсан этагига ҳам етмайдиган кишига эмас*», — деб жавоб берган эди. Дилдор Оғача Бегимнинг узоқ насиҳатлари ва панд-ўйтларидан кейингина Ҳамидабону подшоҳ Ҳумоюнга тегишига розилик берган эди. Ўшанда эндингина 14 ёшга кирган қизнинг ўз тақдирини ўзи ҳал қилиш борасидаги мулоҳазалари, унинг ўз эрки ўз қўлида эканлигини фаҳмлай олиши ўша даврда риоя қилинадиган ахлоқ нормалари, бу жамиятдаги аёлларнинг мавқеи ва уларга бўлган муносабат ҳақида бизга аниқ тушунча бериши мумкин. Ахир, жамиятнинг тараққиёт даражаси аёлларга бўлган муносабат билан ўлчанади, деган ақидалар бежиз эмас-ку.

### ХОНЗОДА БЕГИМ

Хонзода Бегим — Бобуршоҳнинг бир онадан тувишган опаси, у Умаршайх Мирzonинг Кутлуғ Нигор Хоним билан бўлган никоҳидан 1478 йилда дунёга келган эди. Умаршайх Мирzonинг энг катта қизи бўлиб, укаси Бобур Мирзодан 5 ёш катта бўлган. Тарихдан маълумки, тақдир тақозоси билан 1501 йилда Бобуршоҳ Самарқандни Шайбонийхонга ташлаб чиқиб кетаётганда эгачиси Хонзода Бегим «Шайбонийхон илкига тушган» эди ва таомилга кўра, темурий аслзодаларга кўрсатиладиган иззат-икром билан Шайбонийхон уни ўзига никоҳлаб олган эди. Бироқ тарихчи Ҳайдар Мирзо Дўйфлатнинг гувоҳлик беришича, бу никоҳ Бобур Мирзонинг шаҳардан оила аъзолари билан эсон-омон бош олиб чиқиб кетиши учун Шайбонийхон томонидан қўйилган шартлардан бири бўлган эди. Унинг ёзишича, Бобур Мирzonинг қаршилик кўрсатишга ҳеч чораси қолмай, Шайбонийхон билан сулҳ тузиб, опаси Хонзода Бегимни унга берган эди.

Бу ҳолни ўз хотираномасида Гулбадан Бегим ҳам тасдиқлаб, «*Охир Хонзода Бегимни ўша хонга бериб, ўзлари қайтишлари зарур бўлди!*», — деб ёзади. Бу никоҳдан бир

<sup>1</sup> Қаранг: «Ҳумоюннома», Тошкент, 1959, 25-бет. Форсча нусхасидан С. Азимжонова таржимаси.

ўғил дунёга келди ва унга Хуррамшоҳ деб исм қўйдилар. Бироқ бу никоҳ узоқ давом этмади. Эри билан бўладиган зиддиятли мунозараларда Хонзода Бегим кўпинча укаси Бобур Мирзо шаънини ҳимоя қилиш пайида бўларди. Бу ҳол эса Шайбонийхоннинг шубҳасига сабаб бўлар ва: «бир кун келиб укаси билан тил бириктириб менга панд бермасин», деган шубҳа билан Хонзода Бегимни талоқ қиласди ва кўп ўтмай ўз қўшинида қуириқ мансабдаги Сайд Ҳўжа исмли суворийга никоҳлаб беради. Бироқ Марв ёнидаги Шоҳ Исмоил ва Шайбоний ўртасидаги даҳшатли жангда Сайд Ҳўжа Шайбоний билан бирга ҳалок бўлади.

1511 йилда Хонзода Бегим Шоҳ Исмоилнинг ёрдами билан укаси Бобуршоҳ ҳузурига қайтгач, кўп ўтмай ўғли Хуррамшоҳ 10 ёшида хасталик туфайли вафот этади ва уни Бобуршоҳ саройидаги амалдор беклардан Зиёд Маҳди Ҳўжага турмушга берадилар. Бу воқеа А. Бевериж хонимнинг тахминича, «Бобурнома»нинг узилиб қолган йиллари — 1509—1519 йиллар оралиғида бўлиб ўтган бўлиши керак. Гулбадан Бегим ўзининг хотираномасида аммаси Хонзода Бегимни эъзозлаб, энг азиз-кишиси сифатида «оқа жоним», дея тилга олади.

Хонзода Бегим ҳаётнинг барча иссиқ-совугини бошдан кечирган аслзода темурий маликалардандир. У 1545 йилда Кобул яқинидаги Кобулҳақ деган жойда фоний дунё билан видолашди.

### ГУЛБАДАН БЕГИМ

Гулбадаи Бегим Бобуршоҳнинг қизи бўлиб, у 1522 йилда Кобул яқинидаги Кобулҳақ деган жойда туғилган. Унинг онаси Дилдор Оғача Бегим номи билан танилган бўлиб, у малиқанинг асли исми Солиҳа Султон Бегим эди. Шаҳзодалар Ҳиндол Мирзо, Олур Мирзо ҳамда маликалар Гулранг Бегим, Гулчехра Бегимлар ҳам ана шу малиқадан туғилган эди.

Бобуршоҳнинг хотинлари орасида Ҳумоюн Мирзонинг онаси Моҳим Бегим кенг билимли, ақл-заковатли ва доно аёл бўлиб, сарой аъёнлари орасида катта обрув ва иззатикромга сазовор бўлган малика эди. Шунинг учун бўлса керак, Бобуршоҳнинг фармонига биноан 1525 йилда Гулбадан Бегим билан Ҳиндол Мирзо Моҳим Бегим тарбиясига берилган эди. Бу ҳақда «Бобурнома»да ҳам маълумотлар бор.

Гулбадан Бегим ҳар иккала онасини ҳам баравар ҳурмат-эҳтиром билан эъзозлайди. «Ҳумоюннома» асарида түқкан онасини кўпинча «Дилдор Бегим» деб тилга олса, Моҳим Бегимни «Онам ҳазратлари» деб ҳурматлайди. Отаси Бобур-шоҳни эса «Фирдавс макон ва жаннати ошиён» деб таърифлайди.

Гулбадан етти ёшга киргунча Кобулда Моҳим Бегим хузурида яшади ва 1529 йилда подшоҳ отасининг таклифига биноан Моҳим Бегим билан Ҳиндистонга (Аграга) отаси хузурига кўчиб келди ва умрининг қолган қисми Ҳиндистон билан боғлиқ ҳолда кечди. Кейинги воқеалар тафсилотлари «Ҳумоюннома»да муфассал ёритиб берилган. 1539 йилда Гулбадан Бегимни Ҳумоюншоҳ саройидаги амалдорлардан бўлган Хўжа Хизирхонга турмушга узатдилар ва бу никоҳдан бир ўғил фарзанд туғилиб, унга Саодатёр деб исм қўядилар.

Гулбадан Бегим юксак идрокли, ўткир фаросатли, тадбиркор ва ноёб ақл-заковат соҳибаси бўлганидан, ўз даврининг етук билимдони ва олимаси бўлиб этишди. Турмушга чиққандан кейин ҳам акаси Ҳумоюншоҳ саройида унинг энг яқин маслаҳатгўйи ва давлат ишларини юритишда кўмакчиси бўлиб, давлат миқёсидали дипломатик ишларда иштирок этар, мунозарали масалаларни ҳал этишда доно маслаҳатлари билан ёрдамлашар эди. Ҳумоюншоҳ ҳаётининг қувфинда, қийинчиликда кечган кезларида ҳам унинг содик ҳамроҳи, ҳамдарди ва маслақдоши бўлиб қолаверди. 1556 йилда Ҳумоюншоҳнинг тасодифий ўлимидан сўнг ёш шаҳзода Акбар Мирзо таҳтга чиққандан кейин ҳам подшоҳнинг онаси Ҳамидабону Бегим билан бир қаторда ёш подшоҳнинг маслаҳатгўйи ва маслақдоши мавқеида бўлиб, сарой аъёнлари орасида катта ҳурмат ва эҳтиромга сазовор бўлди. Акбаршоҳ томонидан «Фирдавс макон ва жаннати ошиён ҳазрат (Бобуршоҳ — F. C.) ҳақидаги воқеалардан нимаики билсангиз ёзингиз», деган топшириғидан кейин «Ҳумоюннома»ни ёзишга киришган эди.

Бу асарда баён этилган воқеалар муаллифнинг шахсий ҳаёти билан бевосита боғлиқ ҳолда кечган бўлса ҳам, у ўзи ҳақида кам гапириб, асосан, отаси Бобуршоҳ ва акаси Ҳумоюншоҳ ҳаётидан лавҳалар, саройидаги аркони давлат турмуш тарзидан намуналар, подшоҳ оиласидаги удумлар, подшоҳнинг оила аъзолари ва қариндошларига, сарой аъёнларига, амируbekларга муносабатлари ҳамда уларнинг шахсий феълатворини акс эттирувчи мисоллар келтиради. Бўлиб ўтган

воқеалар асарда тўғри баҳоланган ва уларнинг иштирокчи-ларига ҳаққоний тавсиф берилган. Муаллиф ўз даврининг етук сухандонларидан бўлгани учун асар тушунарли ва равон тилда ёзилган. Ундан Ҳумоюншоҳ хукмронлиги даври-даги воқеалар ҳақида қимматли маълумотлар олиш мумкин. Машҳур бобуршунос олима Сабоҳат Азимжонова таъкид-ланганлариdek<sup>1</sup>, Бобуршоҳ вафотидан кейин ҳам давлат тили форс тили бўлиб қолган бўлса ҳам, саройда тарихда «чиғатай тили» деб ном олган ўзбек адабий тилида гаплашилиб, Бобур қайд қилган Андижон диалектида шеър ёзувчи шоирлар тўпландган.

Улуғ Лутфий, буюк Алишер Навоий, машҳур Заҳиридин Муҳаммад Бобур асос соглан маданий муҳитдан нафас олиб вояга етган Гулбадан Бегим ўз асарида ўзбек тилига хос кўплаб ибораларни ва айрим ҳолларда эса мукаммал жумлаларни келтиради. Шу билан бир қаторда асарда ҳинд ва урду тилларидан кирган иборалар ҳам учрайди. Бу ҳол «Ҳумоюннома»нинг тарих, адабиёт, тил тарихи, этнографияни ўрганувчилар учун муҳим манба эканидан далолат беради. Асар мароқ билан ўқилади. Айрим манбаларда Гулбадан Бегимнинг ғазаллар битгани ҳақида ҳам маълумотлар бор.

Акбаршоҳ саройининг тарихчиси, ўз даврининг етук уламоларидан бўлмиш Абул Фазлнинг «Акбарнома» асарида ёзишича, Гулбадан Бегим 1575 йилда Маккан мукаррамага ҳаж сафарига борган ва 1582 йилда қайтиб келган. Акбаршоҳ саройида унга катта нафақа тайинланиб, маҳсус хизматкорлар берилган, 1603 йилда 80 ёшида вафот этган. Уни дафн этиш маросимида Акбаршоҳ аммасига бўлган фарзандлик бурчини адо этиб, марҳуманинг тобутини қабристонгача кўтаришиб борган.

### НУР ЖАҲОН БЕГИМ

Нур Жаҳон Бегим наслий жиҳатидан бобурий маликалар тоифасидан бўлмаса ҳам, Ҳиндистонда хукм сурган бобурий подшоҳларнинг учинчи авлоди бўлмиш Жаҳонгиршоҳнинг иккинчи хотини бўлган эди. Унинг асл исми Мехринисо бўлиб, отаси Мирзо Фиёсбекнинг келиб чиқиши эронлик эди. Мирзо Фиёсбекнинг отаси Ҳўжа Муҳаммад Шариф

<sup>1</sup> Қаранг: С. Азимжонова. Гулбадан Бегим. «Ҳумоюннома», Т., 1959, 23-бет.

исмли киши бўлиб, Эрон шоҳи Шоҳ Тахмасп ҳукмронлиги даврида Язд қалъасида доругалик қилар эди. Унинг вафотидан сўнг, ўғли Мирзо Фиёсбекка мусибатли кунларни бошидан кечиришга тўғри келди ва отасининг дўстларидан бўлган карvonбоши Малик Масъуднинг ёрдами билан 1577 йилда оиласини кўчириб, Ҳиндистонга йўл олди. Карвон Кандаҳорга келиб тин олиш учун тўхтаганда Мирзо Фиёсбекнинг ҳомиладор хотини кўзи ёриб бир қиз дунёга келди. Унга Мехринисо деб исм қўйдилар. Шундан сўнг карvonбоши Малик Масъуд Мирзо Фиёсбекни Ҳиндистонга олиб келиб, танишлари орқали Акбаршоҳ саройига хизматга жойлаштириб қўйди.

Табиатан анча қобилиятли ва шоиртабиат киши бўлганлиги туфайли Мирзо Фиёсбек тез орада аркони давлат назарига тушиб Кобул саройида девонбеги лавозимига тайинланди ва кейинчалик садоқатли хизматлари туфайли Жаҳонгиршоҳ саройида «Эътимод-уд-давла» (*Давлат таянчи*) унвонига сазовор бўлиб, бош вазирлик даражасигача кўтарилди.

1594 йилда 17 ёшга тўлган Мехринисони шаҳзода Салимнинг хизматида бўлган Алиқулибек Истижлу исмли эронлик бир саргузаштталаб йигитта турмушга бердилар. Табиатан жасур ва довюрак бўлган бу йигит шаҳзода Салимнинг ҳаётига чанг solaётган даҳшатли ўлдиргани учун 1599 йилда шаҳзода Салим унга «Шери афғон» деган таҳаллус берган эди. 1602 йилда шаҳзода Салим отасига қарши исён қўтарганда Алиқулибек Шаҳзода Салим хизматидан қочиб, Акбаршоҳ ҳузурига борган эди. Акбаршоҳ вафотидан сўнг Салим Жаҳонгир номи билан таҳт вориси сифатида салтанат таҳтини эгаллагач, Алиқулибекнинг гуноҳидан кечди ва уни узоқ Бенгалияning Бурдван вилоятига маҳаллий афғонларнинг исёнини бостириш учун юборди. Бу ишни муваффақият билан уddaлагани учун унга ўша ердан катта жоғир (*ер мулк*) ажратиб берилди ва шу жойда яشاшига тўғри келди.

Бундай муносабат, яъни марказдан четлаштирилгани учун ранжиган Алиқулибек ўзига юклатилган вазифага совук-қонлик билан қарай бошлади. Подшоҳнинг фармонига кўра 1507 йилда Бенгалияга янги ҳоким этиб тайинланган Кутбиддин Алиқулибекни ўз ҳузурига чақиритириб, бу борада унга танбек бермоқчи бўлганида, бундан фазабланган Алиқулибек қиличи билан уни чопиб ташламоқчи бўлади. Бу машъум ниятни пайқаб қолган Кутбидиннинг соқчилари

унга ташланиб, бир ҳамла билан Алиқулибекни чопиб ташлайдилар.

Алиқулибекнинг бева қолган хотини Мехринисо ва қизи Лодила эса маҳбус сифатида Аграга жўнатилди. Бу ерда Мехринисо Акбаршоҳнинг беваси Салима Бегим хизматига берилади. 1611 йилнинг наврӯз байрами нишонлаётган кунларнинг бирида ҳарам аҳли учун ташкил қилингандан савдо расталарининг бирида Жаҳонгиршоҳ Мехринисони кўриб, унга ошику бекарор бўлиб қолади ва ўша заҳотиёқ унга уйланишга қарор қиласиди. Март ойининг охирида тўй тантаналари бўлиб ўтади. Янги маликага эътиқоди юксак бўлган Жаҳонгиршоҳ кўп ўтмай уни дастлаб «Нур маҳал», кейинроқ эса «Нур Жаҳон» деган ном билан атгай бошлади.

Тарихий манбаларда Жаҳонгиршоҳнинг Мехринисога уйланиши ва унинг аввалги эри бўлмиш Алиқулибекнинг сирли тарзда ўлдирилиши ҳақида бир-бирига зид бўлган турлича фикрлар билдирилади. Бир гуруҳ тарихнавислар (Р. Трипати, С. Р. Шарма, Бени Прасад ва бошқалар) Жаҳонгиршоҳ Мехринисони 1611 йилги наврӯз тантаналарида кўриб қолиб ўша ондаёқ унга уйланишга қарор қилгани ва унинг собиқ эри Алиқулибекнинг ўлимидан Жаҳонгирнинг қўли йўқлигини таъкидлайди. Яна бошқа бир гуруҳ тарихчилар (Ишвари Прасад, Нина Эптон, голландиялик сайдёх Де Лаёт) эса Жаҳонгир шаҳзодалик пайтидаёқ ҳарам хизматига бўлган Мехринисони маҳсус бозорда кўриб қолиб, шу ондаёқ севиб қолгани ва унга уйланишни ният қилгани, бироқ отаси Акбаршоҳ бу тенгсиз никоҳга розилик бермагани учун ўз ниятини унинг вафотидан сўнггина рўёбга чиқариш имконига эга бўлганини, ана шу ниятини амалга ошириш мақсадида маҳсус топшириқ билан Алиқулибекни хуфиёна ўлдиритириб, Мехринисони қўлга киритганини тахмин қилишади. Ҳар хил гап-сўзларнинг олдини олиш учун Алиқулибекнинг ўлимидан кейин тўрт йил вақт ўтгачгина тўй қилингани алоҳида таъкидланади.

Биринчи фикр тарафдорларининг тахминига кўра, Жаҳонгир шаҳзодалик пайтида Мехринисони билмаган, чунки улар ўртасидаги ишқий можаро ҳақида ўша даврда яратилган ёзма манбаларда бу ҳақда фикр билдирилмаган. Бунинг устига, агар Акбаршоҳ шаҳзода Салимнинг Мехринисога ошиқ эканидан хабардор бўлганда, Алиқулибекни шаҳзода хизматига кўймаган бўлар эди ва кейинчалик шаҳзода Салим тахтни эгаллагач, Алиқулибекни мансабга тайинламаган бўлар эди.

Шуни ҳам унумаслик керакки, Алиқулибекнинг ўлдирилишида Жаҳонгирнинг қўли бўлганда, қатъий ирода эгаси Мехринисо Жаҳонгирга турмушга чиқмаган ва унга садоқатли хотин бўлмаган бўларди. Эрининг ўлимидан кейин Мехринисонинг ҳарамга келтирилишига сабаб шуки, унинг отаси Мирзо Фиёсбек ва акаси Асафхонлар ўша пайтда саройда масъул лавозимларда хизмат қиласар эдилар.

Иккинчи фикр тарафдорларига келсак, улар шаҳзода Салим билан Мехринисо ўртасида ёшлигиданоқ ишқий мажаролар бўлиб ўтгани, бироқ Мехринисо Алиқулибекка унаштириб қўйилгани учун Акбаршоҳ бу тенгсиз никоҳга рози бўлмагани, шунинг учун ҳам таҳти эгаллагандан сўнг, Жаҳонгир Алиқулибекдан қутулиш мақсадида уни узоқ Бенгалияга сургун қилиб, у ерда бошқаларнинг қўли билан уни ўлдиртиргани таъкидланади.

Уларнинг фикрича, ота-онаси ва акаси тирик туриб Мехринисонинг Акбаршоҳнинг беваси бўлмиш Салима Бегим хизматига берилиши, албатта, кишида шубҳа уйғотади. Мехринисо саройга келтирилгандан кейин орадан тўрт йил ўтгач қилинган тўй эса, атрофдагиларнинг Алиқулибекнинг ўлими тафсилотлари ҳақидаги шубҳаларини сўндириш учун зарур бўлиб, тўй маросими атайин кечиктирилган эди.

Бу воқеалар тафсилотлари ҳеч қайси бир ёзма манбада зикр этилмаган. Кундалик ҳаётининг ҳар бир дақиқасини баён қилиб ёзиб қолдирган Жаҳонгиршоҳ ўзининг машҳур «Тузуки Жаҳонгирий» деб аталган хотираномасида ҳам Алиқулибекнинг ўлими ва ўзининг Мехринисога уйланиши тафсилотлари ҳақида лом-мим демайди. Ўша даврнинг бошқа тарихчилари (асосан сарой тарихчилари бўлгани учунми) эса подшоҳнинг оиласвий ҳаёти ҳақида холис фикр билдиришга, табиийки, журъат эта олмаган бўлишлари мумкин.

Мехринисо Жаҳонгиршоҳга турмушга чиққанида ўттиз тўрт ёшда бўлишига қарамай, ўзининг ноёб гўзаллигини сақлаб қолган эди. Сарой ҳарамида Мумтоз Маҳалнинг шахсий хизматида бўлган Саттинисо исмли оқсоқ аёлнинг таърифлашига қараганда<sup>1</sup>, унинг юзи оппоқ ва бир оз чўзинчокроқ бўлиб, бодом қовоқлари қалин ва қоп-қора қошлирига жуда ярашиб турар, хушбичим лаблари эса бир оз юпқароқ, нозик ияги остидан бақбақаси билинар-билин-

<sup>1</sup> Қаранг: Нина Эптон. «Менинг севимли маликам Мумтоз Маҳал», «Инглиз тилида. Nina Epton «My beloved Empress Mumtoz Mahal», Dehli, 1994.

мас сезилиб турар, йўғон қилиб ўрилган тим қора сочлари тақимига тушиб турар эди. Унинг ўткир ақл, кучли иродава чексиз файрат-шижоат эгаси экани тийрак кўзларидан, юриш-туришларидан, атрофдагиларга қилган муомаласидан аниқ кўриниб турар эди. У ўқимишли ва ўта маданиятли аёл бўлиб, шеърият, мусиқа ҳамда тасвирий санъатни жуда яхши кўрар, гўзаллик ва нафосатни жуда қадрлар, форсийда «Махфий» таҳаллуси билан газаллар ҳам битиб турар эди. Унинг газаллари исломий газаллар мажмуасига ҳам киритилган. Рассомлик санъатига ихлоси баландлигидан акаси Асафхоннинг қизи Аржумандбонуни шаҳзода Хуррамга узатишдан олдин бўлажак келиннинг суратини ўз кўли билан чизиб шаҳзодага кўрсатган эди. У гуллардан гулчамбарлар ва хушбўй атиrlар тайёрлаш ишини ҳам яхши ўзлаштирган бўлиб, манбаларнинг гувоҳлик беришича, «Атри Жаҳонгирий» атири ҳамда гулобнинг ихтироиси ҳам Нур Жаҳоннинг ўзи бўлган экан.

Табиатан файратли аёл бўлганидан ёшлигиданоқ чавандозлик ва камонбозлик машқларида фаол қатнашар, атрофидаги ёш маликаларни ҳам шунга чорлар эди. Фикр доираси кенг ва тасаввури бекиёс бўлганидан янги бичимдаги либослар, янги нусхадаги тақинchoқ ва безаклар лойиҳасини кашф этар ҳамда тикиладиган сарполар учун дид билан матотанлар эди.

Жаҳонгиршоҳга турмушга чиққандан кейин икки йил ўтмаёқ Мехринисо Подшоҳ Бегим мақомига эга бўлди ва дастлаб «Нури Маҳал» (Сарой чироғи) ва кейинроқ «Нури Жаҳон» (Жаҳон чироғи) унвонига сазовор бўлди. Маъмурий ишларни ҳал этишда ҳам у анча лаёқатли бўлиб, ҳал қилиниши лозим бўлган сиёсий ва дипломатик муаммоларнинг ечим нуқтасини зукколик билан топар ва баҳслашувчи томонларга холисона муносабатда бўлар, давлат аҳамиятига молик ишларни адолат билан ҳал этишга интилар эди. Подшоҳнинг қабул маросимларида номаҳрамлар назаридан парда билан тўсиб қўйилган маҳсус жойда ўтириб иштирок этар эди. Подшоҳ номидан чиқариладиган фармони олийга подшоҳ билан ёнма-ён имзо қўяр, ўша даврда зарб қилинган пулларда унинг ҳам акси туширилган эди. Чунки Жаҳонгиршоҳ майшатга берилиб кетган ёки бетоб бўлган пайларда фармонларга ўзи имзо қўяр эди ва бу ҳужжат салтанат ҳудудида қонун кучига эга деб тан олинарди. Давлат аҳамиятига молик бўлган биронта ҳужжат Нур Жаҳоннинг розилигисиз қабул қилинmas, ёши ўтиб, соғлигининг маза-

си қочиб бораётган Жаҳонгиршоҳ эса бунга монелик қилмас, аксинча, бутун салтанат ишларини суюкли маликасига ишониб топшириб қўйган эди.

Нур Жаҳоннинг подшоҳ эрига бўлган садоқатининг чеки йўқ эди. Уни шунчалик меҳр ва ардоқ билан севардики, Жаҳонгир бундан ҳушини йўқотиб қўярди. Ўғли шаҳзода Хуррам, унинг рафиқаси Аржумандбону, Нур Жаҳон ва оқсоҷа аёл Саттинисо иштирок этган ҳарамдаги суҳбатларнинг биррида мусулмончиликдаги кўп хотинлилик ҳақида гап кетганда, шаҳзода Хуррам, эркак кишининг нечта хотини бўлишидан қатъи назар, улардан биттаси энг суюклиси бўлишини алоҳида таъкидлаб айтган эди. Унинг бу фикрига қўшилиб, Жаҳонгир Мехринисога уйлангандан кейингина ҳақиқий лаззатли оила қандай бўлишини тушунганини тан олиб айтган эди. Ўшанда уялганидан қизариб кетган Нур Жаҳон ҳақида гапириб оқсоҷа Саттинисо: «Шундай кучли иродада эгаси бўлган бу аёлнинг бу гапдан қизариб кетганини ўшанда биринчи бор кўришим эди», деб ҳикоя қиласиди.

Нур Жаҳон жисмонан ҳам бақувват ва шижаатли аёл бўлганидан эри билан тез-тез шикорга чиқиб турап, мўлжалга олган ҳайвон ёки паррандани бехато урар эди. Ов пайтида бир неча бор йўлбарсларни ҳам аниқ мўлжалга олиб, отиб ўлдирган эди. Ҳарбий саркардалардан бўлмиш лашкарбоши Маҳобатхон исён кўтариб Жаҳонгир кетаётган карвонни ҳибсга олганда, Нур Жаҳон шижаат билан жангчи филга минганича, ўз ҳаётини таҳлика остида қолдириб, эрини ҳибсдан кутқарган эди. Ўшанда ўз акаси бўлмиш вазир Асафхонга ношудлиги учун қаттиқ ҳайфсан бериб, сарбозларнинг кўзи олдида жеркиб ташлаган эди. Зарур ҳолатларда унинг уддабуронлик билан ноқулай вазиятдан усталик билан чиқиб кетиш қобилиятига амиру беклар ҳам лол қолишар эди.

Шу билан бир қаторда Нур Жаҳон етим-есирлар ва гарибу фураболарга доим ғамхўрлик қилиб турап эди. Айниқса, мусулмон етим қизларни куёвга чиқаришда уларнинг сепларини ўз ҳисобидан қилиб берар эди. Жаҳонгир ўзининг хотираномасида ёзишича, 500 дан ортиқ қизлар Нур Жаҳон паноҳида бўлган ва турмушга узатилган.

Нур Жаҳон ўз қариндошларини ҳам салтанатдаги юқори лавозимлар билан сийлар эди. Отаси Мирзо Фиёсбек малика қизининг ғамхўрлиги туфайли «Эътимод-уд-давла» (давлат таянчи) унвонига эришди ва саройда давлат маслаҳатчиси мақомидаги лавозимда, акаси Асафхон эса дастлаб сарой доругаси, кейинроқ эса бош вазир мансабини эгаллаган

эди. Аввалги эри Алиқулибекдан бўлган қизи Лодила Бегимни шаҳзода Шаҳриёрга никоҳлаб бергач, уни ҳам совға саломлару мансабу унвонларга кўумиб ташлаган эди.

Жаҳонгир ҳаётининг охирги даврига келиб Нур Жаҳон салтанатнинг ҳақиқий ҳукмдорига айланиб қолган эди. У жуда пухта иш қилас ва ҳар бир ишни белгиланган вақтда бажарар эди. Унинг шахсий савдо дўконлари ва ишлаб чиқариш корхоналари ҳамда шахсий кемаси бўлиб, бу кема ҳажсафарига борувчиларни ташиш билан шуғулланар эди.

Нур Жаҳон саройга келгач, сарой дабдабаларига сарфланидиган сарф-харажатлар кескин ортиб кетди. Шундан кейин у сарой аъёнларининг маълум муддатда ва маросимларда подшоҳга қимматбаҳо совға ва ҳадялар инъом этиш тартибини йўлга қўиди. Аркони давлатнинг энг ўзига ишонган амиру беклари ҳам унга илтижо кўзи билан қарап, унинг ғазабига дучор бўлишдан чўчиб турар эди. Подшоҳдан норози бўлиб исён кўтаргани учун ўлимга маҳкум этилганларнинг кўплари Нур Жаҳонга қилган илтижолари туфайли боши омон қолган эди. Панжоб ҳокими Жагат Сингх ҳам ана шундайлардан бири бўлган эди.

Беайб парвардигор деганларидек, Нур Жаҳон ҳам инсонга хос камчиликлардан холи эмас эди. У ўта рашкчи ва қизғанчиқ бўлиб, мансаб доирасида бошқаларнинг ўзига яқин мавқеда туришини, бироннинг ундаги ҳокимиятга шерик бўлишини сира-сира истамас, чунки бу ҳол ўзининг мавқеига путур етказиб қўйишидан хавфсирар эди.

Нур Жаҳон дастлаб ҳокимият эгаси мақомига кўтарилиган пайтда унинг ота-онаси ҳали ҳаёт бўлиб, улар унинг ҳаддан ошиб кетишидан тийиб турар эдилар. Бу пайтда у шаҳзода Хуррам (Шоҳ Жаҳон) билан анча иноқ эдилар. Шунинг учун ҳам акаси Асафхоннинг қизи бўлмиш Аржуманд-бонуни ўзи бош-қош бўлиб шаҳзодага иккинчи хотин сифатида тўй-тантаналар билан олиб берган эди.

1621 йилда онаси, 1622 йилда отаси оламдан ўтгач, Нур Жаҳоннинг ҳокимиятга бўлган иштаҳасини ҳеч ким жиловлашга журъат эта олмай қолди. У мавжуд қонун ва тартибларга бўйсунишни, атрофдагиларнинг фикри билан ҳисоблашишни истамас эди. Девони омдаги қабул маросимларида ёки муҳим масалалар муҳокама қилинаётган пайтда номаҳрамлар назаридан парда билан тўсиб қўйилган холи жойдан туриб бемалол ўз норозилигини билдираверар эди.

Алиқулибекдан бўлган қизини кичик шаҳзода Шаҳриёрга турмушга бергач, Нур Жаҳон Жаҳонгир вафотидан

кейин ҳам ҳокимиятни ўз ихтиёрида сақлаб қолиши иштиёқида ёна бошлаган эди. Бунинг учун эса тахта күёви, Шаҳриёрни чиқариш керак эди. Шунинг учун ҳам асосий тахт даъвогари Шоҳ Жаҳоннинг тахт сари интилишларида унинг йўлига турли ғовлар солар, аркони давлат назарида уни обрўсизлантириш учун ҳар хил миш-мишлар ва найранглар тўқиб чиқара бошлаган эди. Ўз ниятига етиш йўлида у Шоҳ Жаҳоннинг гўдак ўғиллари Доро Шукуҳ, Шоҳ Шужо ва Аврангзебларни гаров сифатида саройда тутиб туришдан ҳам тоймади. Чунки тахт Шоҳ Жаҳон қўлига ўтгач, ўзининг ҳокимиятдан четлатилишига ишончи комил эди. Шундай бўлди ҳам. Шоҳ Жаҳон таҳтни эгаллагач, қайин отаси Асафхон билан маслаҳатлашиб, Нур Жаҳонни давлат ишларидан умуман четлатди. Унга нафақа тайинланди ва қолган умрини эрининг мақбарасини қуриш ишлари билан овора бўлиб, Лохурда, ўзига ёқсан хизматкорлари куршовида ўтказди ва 1645 йилда оламдан ўтди.

### МУМТОЗ МАҲАЛ БЕГИМ

Юқорида айтилганидек, Мумтоз Маҳал Шоҳ Жаҳоннинг энг севимли маликаси бўлиб, унинг асл исми Аржумандбону эди. Унинг отаси Асафхон эронлик Мирзо Фиёсбекнинг ўғли бўлиб, Жаҳонгиршоҳ ва Шоҳ Жаҳон саройида отаси билан бир қаторда обрўли лавозимларда хизмат қилган, умрининг охирига келиб бош вазир даражасига кўтарилган эди.

Аржумандбону 1594 йилда туғилган бўлиб, отаси унинг мукаммал билим олиши учун барча шароитни яратиб берган эди. У араб, форс ва ҳинд тилларини мукаммал билар, ўткир заковати туфайли Қуръони каримни ёд олган эди. У маданиятли ва ўта одобли қиз бўлиб етишган, шу билан бир қаторда, у ноёб гўзаллик ва иффат соҳибаси эди. Ҳинд адабијаси Нина Эптоннинг юқорида номи зикр этилган асарида айтилишича, у балофат ёшига етгач, турмушга узатилиш арафасида унга Саттинисо исмли мусулмон қиз шахсий хизматкор (оқсоҷ) қилиб тайинлаб берилган эди. Ушбу асарнинг асосий қаҳрамони ўша Саттинисо бўлиб, асаддаги воқеалар унинг тилидан Аржумандбонунинг энг кичик қизи (ўн тўртинчи фарзанди) Гавҳароро Бегимга ҳикоя қилиб берилган.

Саттинисо Аржумандбонуни биринчи кўришдаги таассурутини шундай таърифлайди: «Менинг дикқатимни торт-

ган биринчи нарса унинг Жамна дарёси устида эрта тонгда пайдо бўладиган туманни аста тарқатиб юқори кўтарила-ётган қўёш нурлариdek илиқ ва майин жилмайши бўлди. Унга табиат кишининг ҳавасини ҳайратомуз тарзда қўзғотадиган камтарона гўзаллик ҳадя этган эди. Ҳар қандай одамни мафтун эта оладиган жозибаси борлигидан унинг ўзи ҳам хабардор эмасга ўхшарди, назаримда. Унга гўзаллик баҳш этадиган нарсаларнинг энг муҳими — ёниб турган катта-катта кўзла-рию юзининг майин ифодаси, белигача тушиб турган қопқора ялтироқ соchlари, қалин қип-қизил лаблари эди. Унинг бадани майин етилиб пишган ўрик рангида бўлиб, ияги бир оз чўзиқроқ, унинг остидан сезилар-сезилмас бақбақаси кўзга ташланиб турарди. Ўнг ёноғида чиройли кулдиргич чуқурчаси бўлиб, бу унинг икки хислатидан: биринчиси, нозик қалбида яшириниб ётган кучли иродасидан, иккинчи томондан, кулги шинавандалиги ва ҳаёт неъматларидан лаззатлана олиш кайфиятидан гувоҳлик бериб турарди. Кўллари кичикроқ, бармоқлари калта ва бақувват бўлиб, бу ҳол эгасининг саҳоватли ва маҳоратли эканидан далолат бериб турар эди. Ҳаракатлари оҳуницидек нозик ва ёқимли, овози эса майин ва сероҳанг эди».

1611 йилнинг 26 июнида Аржумандбонуни Жаҳонгиршоҳнинг иккинчи ўғли шаҳзода Хуррамта катта тантаналар билан кўёвга узатдилар.

Ҳиндистанда кенг тарқалган одатга кўра, Фотеҳпур Секри (Фолиблар шаҳри)да истиқомат қилувчи машҳур мунажжим мўйсафид чолга Аржумандбонунинг келажагини башорат қилиб беришларини сўраб мурожаат этишганда, бу авлиё чол: «Сен жуда машҳур бўласан, бироқ бошқа ном билан таниласан», — деган эди. Саттинисонинг фикрича, ўшанда бу авлиё яна нималардир демоқчи бўлган-у, аммо қандайдир андишаларга бориб фикрини очиқ айтмаган эди.

Ҳақиқатан ҳам, Аржумандбону турмушга чиққандан кейин кўп ўтмай ўзининг бетакрор гўзаллиги, ахлоқу одоби, аёллик иффати, ҳаёси ва назокати билан, шунингдек, эрига бўлган соф севгиси ва садоқати, фарзандларига меҳру муҳаббати, атрофдагиларга самимий муносабати ва меҳршафқати туфайли сарой аъёнлари, ҳарам аҳли ва айниқса, қайнотаси Жаҳонгиршоҳ назарида катта обрў қозонган эди.

Аржумандбону табиатан жуда камтар ва художўй аёл бўлиб, мусулмончиликнинг барча удум, эътиқодларини садоқат ва ихлос билан адо этар, бу борада эрига ҳам катта таъсир кўрсатар эди. (Чунки шаҳзода Хуррамнинг онаси ма-

ҳаллий ҳинд рожасининг қизи бўлиб, Будда динига сифи-  
нар эди.)

Саройдаги ҳаётининг дастлабки даврида маҳсус ажра-  
тилган тарбиячилар ва хизматкорлари бўлишига қарамай,  
фарзандлари тарбияси билан шахсан ўзи шуғулланар,  
тўнгич чақалоқ қизи Чаманийни ўзи чўмилтирас, иккин-  
чи қизи Жаҳоноро иккаласига кечалари эринмай эртаклар  
ва топишмоқлар айтиб беришга жуда моҳир эди.

Шоҳ Жаҳоннинг бизга маълум бўлган барча фарзандла-  
ри Аржумандбонудан туғилган. У унча узоқ бўлмаган умри-  
нинг охиригача жами ўн тўртта фарзанд кўрган, бироқ улар-  
нинг еттитаси гўдаклигига ёқ турли касалликларга чалиниб  
оламдан ўтган. Энг катта қизи Чаманий вафот этганда, у  
жуда қаттиқ изтироб чеккан ва бир неча кунгача туз тотмай  
аза тутган эди. Бўш пайтларида жажжи набирасини суюб  
эркалатиш подшоҳ бобоси Жаҳонгирнинг ҳам севимли маш-  
гулотларидан бўлиб қолган эди. Набираси Чаманийнинг  
вафоти ҳақида у ўз хотираномасида «*Унинг жон қуши нозик  
қафасдан учеб чиқиб жаннат боғларига бориб қўнди*», деб  
ёзган эди. Келини Аржумандбонуни ҳар кўрганда унинг  
қайғусидан юраги эзилиб, кўнгли бузилавергач, у ҳовли  
ўртасидан девор олдириб қўйган эди.

Аржумандбону шаҳзода Хуррамнинг барча ҳарбий  
юришларида унга ҳамроҳлик қилас, унинг қувончли ва  
ташвишли кунларида унга шерик бўлар, зарур ўринларда  
оқилона маслаҳатлари билан эрининг муваффақиятларига  
сабабчи бўлар эди.

Эри жангга отланган кезларда унинг совути ичидан ки-  
йиладиган кийимларига Куръони каримдан олинган оят-  
ларни ёзиб тумор қилиб берар, эри қайтгунча кечалари миж-  
жа қоқмай унга Аллоҳдан паноҳ тилаб тиловат қилиб чиқар  
эди.

Ана шундай кутишлардан тоқати тоқ бўлиб ўтирган кун-  
лардан бирида Аржумандбонунинг бир оз кўнглини ёзиш  
ниятида қайнотаси Жаҳонгиршоҳ ўлимга маҳкум этилган  
бир маҳбус билан фил ўртасида бўладиган жангни томоша  
қилишга таклиф қилиб қолади. Аржумандбону ўша кезлар-  
да ҳомиладор бўлиб, яқинда кўз ёриши кутилаётган эди.  
Ўшанда табиатан ўта иримчи бўлган малика бундай ҳолатда  
филдек бадбашара маҳлуққа узоқ тикилиб туриш унга мум-  
кин эмаслигини, акс ҳолда туфилажак чақалоги ҳинклар  
худоси Ганешга ўхшаб филбашара бўлиб туғилишидан чўчи-  
шини айтиб, бу мудҳиш томошага бора олмаслигини бил-

дирган ва қайнотасидан узр сўраган эди. Айтишларича, ўша даҳшатли жанг шартларига биноан, фил билан бўлган жангда ўлимга маҳкум этилган маҳбус филдан ғолиб чиқиб, ўз жонини асраб қолган эди.

Табиатан жасур ва гайрат-шижоатли аёл бўлишига қарамай, Аржумандбону ҳайвонот оламига нисбатан жуда меҳр-шафқатли ва раҳмдил аёл бўлган. Хизматкори Саттинисо билан бўлган сұхбатларнинг бирида у шундай деган эди: «Мен бир пайтлар шикорда она кийикни мўлжалга олиб, отиб йиқитган эдим. Унинг олдига етиб боргач, жон талвасасида ётган юзига тикилиб туриб ички кечинмаларини уққандай бўлдим: у уясида қолдириб келган ёш болаларининг ташвишида кўзёши тўкаётган эди. Шу-шу бўлдию, ўзимни йиртқич ҳайвондан ҳимоя қилиш зарурати бўлмаса, тирик махлуқотни ўлдиргим келмайди».

Унга отаси бир турк савдогаридан сотиб олиб совға қилган Ванна исмли мушуги ва Бахти исмли фили бор эди. Малика барча юриш ва сафарларида уларни ҳам ўзи билан бирга олиб юрар эди.

Унинг эрига бўлган садоқати чексиз эди. Ҳарбий юришлардан бирига жўнашдан олдин шаҳзода Хуррам Аржумандбонудан бу сафарги жанг хавфли эканини айтиб, унинг хавфсизроқ қасрлардан бирида қолишини сўраганда, «Мен сизнинг қаерда ва қай аҳволда эканингизни билолмасам, менга шоҳона ҳаётнинг нима кераги бор? Бундан менинг ҳаловат топишимга ишонасизми? Тангрим асрасину, бордию зиндонга тушсангиз, мен ҳам сиз билан бирга бўламан. Менинг тақдирим яхшими, ёмонми фақат сиз билан. Сиздан ажралмайман», деб жавоб берган эди. У канизаги Саттинисога ҳам қўпинча «Хуррамсиз ҳаёт мен учун ҳаёт эмас», деб тақрорлар эди.

1614 йилда Ажмор ва Ражастонга, 1617—1618 йилларда Деккон ўлкасига, 1620 йилда Кашмир воҳасига қилинган сафарда у эрига ҳамроҳлик ва ҳамдардлик қилган. Қувфинликнинг оғир кунларида чангальзор ўрмонларда ва форларда қўпол этик кийиб юришга рози бўлган, дарёлардан кечиб ўтишда ҳаётини қўп марта таҳлика остида қолдирган ва ўзининг қатъий иродали аёл эканини намойиш қилган.

Ана шундай оғир кунларнинг бирида Орисса вилоятидаги дарёни кечиб ўтишда кучли тўфон кўтарилиб, солдан ўтаётган филнинг оёғи тойилиб кетиши натижасида фил устидан учиб, шиддат билан оқаётган дарёга қулаб тушган ва сувга фарқ бўлишига бир баҳя қолган эди. Саттинисонинг

абжирлик билан қылган ҳаракати туфайлигина зүрға омон қолган. Ўшанды бир оёғининг сон суяги қаттиқлат еб, анчагача ўзига келолмай юрган эди.

1623—1627 йилларда Жаҳонгир ва Шоҳ Жаҳон ўртасига Нур Жаҳоннинг найранглари туфайли совуқчилик тушиб қолганда, Аржумандбонунинг оқилона маслаҳатлари билан ота-бала ўртасидаги муносабат юмшаган, исёнкор ўғилнинг отасидан узр сўрашига эришилган эди. 1628 йилда Шоҳ Жаҳон таҳти эгаллагач, бир неча йиллаб ўзининг саргардон-лик йилларида эрининг қувонч ва ташвишларига шерик бўлиб, унга ҳамдардлик қилгани ва садоқати учун миннатдорчилик белгиси сифатида Шоҳ Жаҳон Аржумандбонуга «Мумтоз Маҳал» (Саройда тенги йўқ) деган унвон берди ва кейинги ҳаётида у ана шу ном билан атала бошлади. Ўшанда Саттинисо Фотеҳпур Секридаги башоратчи авлиё чоннинг «Сен бошқа ном билан машҳур бўласан», деган сўзини эслатганда, Аржумандбону кулиб, «Ҳўп, ўша авлиё башоратнинг бир қисми рўёбга чиқди, энди машҳур бўлишим учун нима қилишим керак?», деган эди...

Шоҳ фармонига биноан унга йилига бир миллион рупий маош тайинланган эди. Бу маблагни у асосан канизаги Сат-тинисо топиб келган етим-есир ва бева-бечораларга ҳам мод-дий, ҳам маънавий ёрдам бериш учун сарфлар эди. У жуда раҳмидил аёл бўлганидан саройга — подшоҳ ҳузурига кел-ганларнинг жазирама иссиқдан ва кучли ёғаётган ёмғирдан ҳимоялаш учун Девони ом олдидаги майдон усти том билан ёпилиб, пана жой қилинди. Унинг таклифига биноан мам-лакат ҳаётида сезиларли ислоҳотлар ўтказилди: Maxsus «мух-тасиб»лар назорати орқали мамлакатда гиёҳванд моддалар ва май тайёрлаш, уларни истеъмол қилиш ва сотиш тақиқ-ланди, ҳиндлардаги «сатии» одати ёш болали аёллар учун бекор қилинди. Бу удумга кўра эри вафот этган аёллар эри-нинг жасади ёқилаётган оловга сакраб ўзларини ўтда ёқиши-лари лозим эди. Камбағал ва бева-бечораларга кўплаб мод-дий ёрдам уюштирилди.

У ўта художўй мусулмон бўлганидан бошқа динларга нисбатан совукроқ муомалада бўлар, ҳиндларнинг мусулмончиликни қабул қилишларини олқишилар, иезуитлар бутхоналарининг таъмирланиши ва янгитдан курилишига унчалик раъй бермас, бу динларнинг якка тартибда уйларда эътиқод қилинишини талаб қиласр эди. Унинг саъй-ҳаракати билан Маккан мукаррамадаги азиз-авлиёларга ҳам кўплаб хайр-эхсон юбориб турилар эди. Саройдаги шоирлар, санъ-

аткорлар ва таржимонлар ҳам унинг ғамхўрлигидан баҳраманд бўлар эдилар. Подшоҳ давлат аҳамиятига молик ишларни фақат унга ишонар ва ҳарбий юришларга кетганда давлат ишларининг боришини Мумтоз Маҳал ўзи назорат қиласади. Маликанинг саъй-ҳаракатлари билан саройда гийбат ва ифвогарликларга чек қўйилган. Ҳар бир ходимнинг аниқ вазифаси бўлиб, уларнинг ижроси Мумтоз Маҳал назоратида турар эди.

Шоҳ Жаҳон ҳукмронлигининг учинчи йили — 1631 йилда оғир мусибат рўй берди. Деккон ўлкасидағи маратхалар яна бош кўтариб, подшоҳ салтанатига бўйсунишдан бўйин товлаётгани ҳақида хабар келди. Бу исённи бостириш учун Шоҳ Жаҳон бошлиқ қўшин Бурҳонпурга келди. Ўшанда ёши қирққа яқинлашиб қолган Мумтоз Маҳал ўн тўртинчи фарзанди бўлмиш Гавҳароро Бегимга ҳомиладор эди. Ориссадаги дарёдан ўтишдаги ҳалокатдан кейин малика ҳали тўлалигича соғайиб ўзига келиб улгурмаганди. Шунга қарамай, у соқчи фаришта сингари эрининг ортидан қолмай бу ерга келади. Маликанинг ой-куни етиб, доя аёллардан бири унинг қиз туққанидан хабар берди. Бироқ у, маликанинг жуда кўп қон йўқотганидан хавотирга тушиб, Шоҳ Жаҳонни чақиртириш зарурлигини тайинлади. Малика: «Хуррамни чақиртирип, мен ўляпман, ўлимим олдидан уни кўрмоқчиман», — деган экан... Шундан сўнг, «Мумтоз қиз туғди, бироқ у ҳаёт билан видолашяпти, тезда етиб келинг», деган мазмундаги хат билан подшоҳга чопар жўнатилди.

Шоҳ Жаҳон етиб келгач, улар анчагина хонада ёлғиз қолдилар. Ниҳоят, Саттинисо хона эшигини аста очиб ичкарига мўралаганда Мумтознинг оппоқ жонсиз қўлларини тутганча Шоҳ Жаҳон ерда бехуш ётарди. Мумтоз Маҳал бу ёруғ оламдан кўз юмган эди.

«Эй парвардигор, инсон чидаб бўлмайдиган бу мусибатга бардош бериш учун менга ўзинг мадад бергун». Анча вақт ўтгач ўзига келган подшоҳнинг биринчи бор айтган сўзлари ана шу бўлди. Кейинчалик айнан ана шу сўзлар маликанинг қабр тошига ҳам ўйиб ёздирилди.

Мумтоз Маҳалнинг жасади Аграфа келтирилиб, сўлим бир боғ ичига дағн этилди. Суюкли маликасининг вафотидан изтиробга тушган Шоҳ Жаҳон саккиз кунгача бир хужрага қамалиб олиб туз тотмади. Унинг бу аҳволини кўриб барча изтиробга тушар, лекин унинг олдига киришга ҳеч ким ботина олмас эди. Унинг соч-соқоли ғамдан оппоқ

оқариб кетган эди. Шундан сўнг қизи Жаҳоноро ҳузурига кириб, уни овқат ейишга, сув ичишга кўндиради.

Оқила бу қиз отасини бу аҳволдан кутқариш ва кўнглини кўтариш учун унинг бошқа хотинлари ва канизаклари подшоҳнинг атрофида парвона бўлиб, кўнглини олишга, шу йўл билан уни яна аввалги ҳаёт тарзига қайтаришга ундар эди. Бироқ, ўша давр тарихчиларининг гувоҳлик беришича, Шоҳ Жаҳоннинг бошқа хотинларига бўлган муносабати унинг Мумтоз Маҳалга бўлган муҳаббатининг мингдан бир қисмича ҳам эмасди. Бир неча кунлик саъй-ҳаракатлардан кейингина подшоҳ бир оз ўзига келиб, вазирларни ва сарой аъёнларини қабул қила бошлади.

Махсус фармон чиқарилиб, саройда икки йилгача мотам эълон қилинди. Кўнгил очар маросимлари, мусиқа ва ашула айтиш, мушк-анбарлар сепиш, серҳашам либослар кийиш, қимматбаҳо тақинчоқлар тақиб ясаниш тақиқланди.

Шоҳ Жаҳоннинг кейинги йигирма йиллик умри севимили маликаси Мумтоз Маҳалнинг соф муҳаббати ва садоқати рамзи сифатида унинг хотирасига бағишлиб қурилажак ноёб мўъжиза — Тож Маҳал мақбарасини бунёд этишга бахш этилди. Дунёнинг барча бурчакларидан манаман деган машхур усталар, хунармандлар ва меъморлар келтирилди. Ушбу буюк обидани барпо этишда йигирма мингдан ортиқ одам меҳнат қилди ва энг ноёб қурилиш моллари ишлатилди.

Мақбаранинг атрофи ям-яшил боғ билан ўралган бўлиб, унинг асосий биноси боғ сатҳидан 6—7 метр баландликка кўтарилган, бино саҳни 14 квадрат метр майдонни эгаллайди. Гумбазининг ер сатҳидан баландлиги эса 60 метрга етади. Мақбаранинг тўрт бурчагидан қад кўтарган миноралар баландлиги 50 метрдан ортиқроқ. Бинонинг олд томонидаги оқ мармар деворга қора мармардан тайёрланган таҳтачага Куръони карим оятларидан калималар жимжимадор қилиб ўйиб ёзилган. Бинонинг ички қисми ҳам ўта маҳорат ва нозик дид ила сержило қилиб ишланганлиги билан кишини лол қолдиради. Ҳинд тарихчиси Л. П. Шарманинг таъбири билан айтганда, Тож Маҳал ўзининг улуғворлиги ва жилоси билан «*Нафақат бобурийлар меъморчилигининг, балки бутун жаҳон меъморчилигининг бетакрор намунаси*»dir. Бу улкан обидани бунёд этишда бош-қош бўлган бош меъмор Устод Исо исмли уста бўлиб, атроф боғни эса Ранмал исмли ҳинд боғбони режалаشتирган.

Бу обида гўзалгина эмас, балки муқаддас ҳамdir. Унда вафодор ёрнинг соф севгиси ва садоқати куйланади. Саттинисонинг таъбири билан айтганда, бу муҳташам ёдгорликка тикилиб туриб Аржумандбонунинг күёвга чиқиш олдидан унинг келажак тақдирини башорат қилиб берган Фотеҳпур Секридаги авлиё чолнинг, «*Сен бошқа исм билан машҳур бўласан*», деган сўзлари ижобат бўлгандай туюлади кишига. Ўшанда, эҳтимол, авлиё чол қандайдир андиша билан: «*Бироқ сен машҳур бўлиш учун бу дунё билан видолашувинг керак бўлади. Сенинг шон-шуҳратингга эринг ҳам шерик бўлади. Сизларнинг севгингиш ва ўлимингиз дунёга буюк бир ёдгорлик обидаси ҳадя этади. Бунга нима дейсан? Шунга тайёрмисан?*» демоқчи бўлгандир. Агар ўшанда авлиё Аржуманддан бу савонни сўраганда, у ҳеч иккиланмай, «*Мен бу шартни қабул қилишга тайёрман*», деб жавоб берган бўлар эди.

### ЖАҲОНОРО БЕГИМ

Жаҳоноро Бегим Шоҳ Жаҳоннинг Мумтоз Маҳалдан туғилган фарзандларининг иккинчиси бўлиб, унинг биринчи тўнғич фарзанди Чаманий исмли қиз эди. Жаҳоноро Бегим 1614 йилда Ажмор вилоятига қилинган навбатдаги сафарлардан бирида туғилган. Чақалоқлигиданоқ унинг тарбияси билан онаси Аржумандбонунинг ўзи шуғулланган ва қизининг ҳар томонлама чуқур билим олиши учун барча шароит яратиб берилган эди. У тўққиз ёшга тўлгандаёқ балофат ёшида бўлиб, атрофида бўлаётган воқеа-ҳодисаларни мустақил таҳлил қилиб, улардан мантиқий хulosалар чиқара олар эди. Шунинг учун бўлса керак, отаси шаҳзода Хуррам ва бобоси Жаҳонгиршоҳ ўртасида бўлиб ўтган можаро ва низоларга етук инсон назари билан қарап ва бу ишларда кимнинг қўли борлигини, ким ҳақу ким ноҳақ эканини яхши фаҳмлар эди. Отасига чексиз эътиқод назари билан қарап, унинг барча муваффақиятларидан қувонар, омадсизликларидан эса изтироб чекар эди. Балофат ёшига етгунча отаси унга ўғиллари қаторида муомала қиласар эди. Уларга ов саргузаштларидан, ёввойи ҳайвонларнинг феъл-атворидан, ҳарбий юришларда рўй берган қизиқ воқеалардан ҳикоялар сўйлаб берар эди.

Онаси Аржумандбону унга илоҳиёт илмидан, энагаси Саттинисо эса мусиқа илмидан сабоқ берар эди. Шунингдек, Жаҳоноро камонбозлик ва чавандозликда яхши натижаларга эришар эди. Табиатан серғайрат ва жасур қиз бўлиб, бўшанг йигитларни ёқтирумас эди. Юмшоқ табиат кичик

амакиси шаҳзода Парвез ҳақида сўз кетгудай бўлса, «Анави лапашанг Парвез амаки», деб гапирап эди. Шижиоатли ва шаддодлигига қараганда, катта аммаси Нур Жаҳонга хос фармонбардорлик хислатлари кўзга ташланиб туар эди. У ўн икки ёшга етганда саройда бўлаётган воқеаларни, аркони давлат ва шаҳзодалар ўртасидаги кўзга кўринмас низолар ва рақобатни фаҳмлаб олиш қобилиятига эга бўлиб қолган эди. Бу можароларда отасининг тўғри йўл тутаётганига ва албатта ҳақ бўлиб чиқишига ишонч кўзи билан қарап, бунга ҳеч шубҳа қилмас эди. Шунинг учун ҳам отасига жуда садоқатли ва меҳри баланд эди. Отаси щаҳзода Хуррам подшоҳ бобоси Жаҳонгиршоҳнинг адолатсизлигига қарши исён кўтарганда, иккинчи бобоси (онасининг отаси) бош вазир Асафхон Кашмир саёҳатига олиб бориш баҳонаси билан шаҳзода Хуррамнинг болаларини гаровга олиб кетиш мақсадида келганда, Жаҳоноро бобосининг ёмон ниятда келганини дарров фаҳмлаб отасисиз ҳеч қаёққа бормаслигини шартта айтган ва бобосининг совғаларига қайрилиб ҳам қарамаган эди.

Жаҳоноро ёшлигиданоқ онасининг содик ёрдамчиси бўлган эди. Укалари Доро Шукуҳ, Шоҳ Шужо, Аврангзеб ва Мурод Бахшларга кўп ғамхўрлик қилар, айниқса, Аврангзебга нисбатан алоҳида меҳр кўзи билан қарап эди.

Отаси Шоҳ Жаҳон таҳтга чиққанда Жаҳоноро ўн тўрт ёшда эди. Отасининг фармонига биноан онаси Мумтоз Маҳалга йилига бир миллион, Жаҳонорога эса олтин юз минг рупий миқдорда маош тайинланган бўлиб, отаси севимли қизини дуру жавоҳирларга кўмиб ташлаган эди. Онасининг вафотидан кейин эса отасининг барча бойликлари Жаҳоноронинг ихтиёрига берилган эди. Подшоҳ отаси ҳарбий юришларга кетганда у онаси Мумтоз Маҳал Бегим билан биргалиқда салтанатдаги ишларнинг боришини назорат қилар, саройга келган меҳмонлар ва расмий вакилларнинг аёлларини кутиб олар, уларнинг кўнгил очишлари учун турли тадбирлар белгилар эди. Уларни рисоладагидек совға-саломлар билан сийлаб кузатиб кўйиш вазифаси ҳам унинг зиммасида эди. Бу ишларни ҳал этишда у ўзининг ниҳоятда тадбиркор ва уддабуронлигини намойиш қилар эди.

Онаси вафот этганда Жаҳоноро ўн етти ёшда эди. Ўшанда қаттиқ изтиробга тушган подшоҳ отаси саккиз кунгача туз totмай, ҳузурига ҳам ҳеч кимни йўлатмай аза тутган эди. Бошига оғир мусибат тушган отасининг ҳузурига Жаҳоноро биринчи бўлиб киради ва уни юпатиб, кўнглига таскин бергач, бирон нарса тамадди қилишга кўндиради.

Бундан буён Жаҳоноро салтанат ишларини бошқаришда отасининг яқин ҳамроҳи ва ишончли маслаҳатгўйига айланниб қолган эди. Унинг маъмурий ишларни ҳал этишдаги адолатли тадбирлари туфайли сарой аёнлари орасида обрў-эътибори ва мавқеи жуда кўтарилиб кетган эди. У мамлакатда ободончилик, меъморчилик ва хайрия ишлари учун маблағларни аямай сарфлар эди. Шу билан бирга ўзи ҳамижодий иш билан машғул бўлгани ва «Рисолаи Соҳибия» (*Дўстлик ҳақида рисола*) номли асар ёзив қолдиргани маълум.

Отасининг соғлиғи бир оз ёмонлашиб қолганда шаҳзода укалари ўртасида таҳта талашиш натижасида чиққан кескин низоларда ҳам Жаҳоноро уларга одилона ҳакамлик қилиш, мамлакатни уларга тенг бўлиб бериш чораларини кўради, лекин қайсар ва такаббур Аврангзеб бу маслаҳатларга кўнишни истамади.

Укаларининг таҳт талашиши орқасида рўй берган фожиалардан қаттиқ изтиробга тушган Жаҳоноро бу дунё ишларидан ҳафсаласи пир бўлиб, отасининг ҳибсда ўтган кунларида унинг хизматида ва унга таскин бериш билан машғул бўлди. Умрининг қолган қисмини камтарона ҳаёт кечириш билан ўтказиб, 1681 йилда бу бевафо дунё билан видолашди.

## **МУНДАРИЖА**

Муқаддима .....	3
Бобурий шаҳзодалар шажараси .....	4
Заҳирииддин Муҳаммад Бобур .....	6
Бобуршоҳ оиласи .....	7
Ҳумоюншоҳ .....	13
Акбаршоҳ .....	17
Жаҳонгиршоҳ .....	29
Шоҳ Жаҳон .....	38
Аврангзеб Оламгир .....	42
Бобурийлар саройидаги маликалар .....	48
Хонзода Бегим .....	50
Гулбадан Бегим .....	51
Нур Жаҳон Бегим .....	53
Мумтоз Маҳал Бегим .....	60
Жаҳоноро Бегим .....	67

*Илмий-тарихий жанр*

**ФОФУРЖОН СОТИМОВ**

**БОБУРИЙЗОДАЛАР**

*Тошкент «Маънавият» 2003*

Мұхаррир *У. Құчқор*

Рассом *М. Агаямов*

Техн. мұхаррир *Т. Золотилова*

Мусаҳҳих *С. Абдусаматова*

Теришга 02.01.2003 й. да берилди. Босишга 03.02.2003 й. да рухсат этилди. Бичими 84×108/<sub>32</sub>. Таймс гарнитураси. Офсет босма усулида болылди. Шартли б. т. 3,78. Шартли кр-отт. 4,2. Нашр т. 4,08.3000 нұсха. Буюртма №К-9699. Нархи шартнома асосида.

«Маънавият» нашриёти. Тошкент, Буюк Турон, 41-үй. Шартнома 15—03.

Ўзбекистон Республикаси Матбуот ва ахборот агентлигининг Тошкент матбаа комбинатида чоп этилди. 700129. Тошкент, Навоий кўчаси, 30-үй. 2003.